

四庫全書

經部

欽定四庫全書

經部  
四書蒙引卷六

詳校官給事中<sub>臣</sub>戴璐

刑部郎中<sub>臣</sub>許兆椿覆勘

總校官編修<sub>臣</sub>倉聖脈

校對官中書<sub>臣</sub>葉蘭

謄錄監生<sub>臣</sub>高應龍

欽定四庫全書

四書蒙引卷六

明 蔡清 撰

雍也第六

雍也可使南面

斐一條減四十字

有人君之度度猶言體也不止德量如言德量止說得寬洪色不得簡重寬洪而不褊急簡重而不輕躁自是宜居人上 孔子稱仲弓可使南面盖以其寬

洪簡重有人君之度也實是取其居敬行簡仲弓蓋有以窺見夫子之意有在於此又自覺其所以為簡有與尋常人不類者故問伯子如何將因夫子之與否以證簡之得失也 仲弓之簡蓋凡事惟擇其要者行之伯子之簡則於其要者亦在所畧矣只是厭煩底人耳 可也簡言僅可者以其簡也 三箇可字要辨可也簡者可其簡而非可其南面也夫子之意正病伯子之居簡行簡也故於可也下露出一簡



字仲弓未悟夫子之意在此以夫子是可伯子之居  
南面也故曰居敬而行簡以臨民不亦可乎言不亦  
可南面乎居敬而行簡毋乃太簡乎豈亦可南面乎  
臨民字正從南面字來是雖疑夫子之言而實得夫  
子之意矣故曰雍之言然仲弓之言即夫子之意也  
仲弓之誤在於認兩可字為同居敬不止是心如  
居處恭執事敬皆是簡却是臨民事居字與行字  
相對居自合敬行自合簡居簡則不是先自處以

敬則中有主故臨事之際自能明灼事幾而無私意之擾切要在中有主上中無主則所行又簡太四散而無檢束收拾了自處既敬則雖行簡亦簡得是不至無法度之可守了若居簡行簡則全任簡不管是不是都從簡略去了蓋簡可以施於人而不可掩於己故行簡則可居簡則不可自己却要嚴謹不可簡簡便是自恕了故曰居敬則自治嚴居簡則自治踈

哀公問弟子

芟二條

哀公問孔子弟子孰為好學孔子對曰有顏回者好學何以見其好學夫人之常情怒于甲未免移于乙過于前未免復于後而回也怒于甲者不移于乙過于前者不復于後回也克己之功一至于此可謂真好學矣惜乎不幸短命死矣今也弟子中無有如其好學者不特弟子中所無抑亦未聞有如此之好學者既曰令也則亡又曰未聞好學者蓋深惜之又以

見真好學者之難得也 好學只是用工夫處不遷  
怒不貳過是工夫已到了事不是就此事上用工夫  
工夫全在克已上所謂非禮勿視聽言動者到不遷  
怒不貳過便是已成就時節然非用力克已者不能  
至此故曰好學之符驗也 不曰顏子克已之功如  
此而必曰至于如此故曰好學之符驗也蓋此非好  
學之篤者不能也若程子却連着勿視聽言動說意  
亦差些圈外註也 甲乙是兩人若以先後言便是

不中節不是遷移也前後是兩時所失不萌於再聖人則怒自然不遷心自無過可貳此孔顏之所以異

子華使於齊

減八字

子華為孔子出使于齊冉子子華友也為子華之母請粟於孔子孔子答之曰吾與之釜釜六斗四升冉子病其少而請益夫子曰吾與之庾庾十六斗冉子又病其少欲再請益則不可乃自與之粟五秉五秉則八十斛矣此冉子之粟非冉子私以夫子之粟與

之也夫子聞而非之曰赤之為我適齊也乘肥壯之馬衣輕暖之裘其富如此我聞之君子周人之急而不繼人之富如今子華已富而汝乃為之請粟而又多與之不為繼富乎夫子此言所以責冉子多與之非而又以見已之所以與少之意也蓋赤苟至乏則夫子必自周之不待請益矣 孔子為魯司寇原思為之宰宰有常祿夫子與之粟九百皆其所當得者原思辭而不受孔子止之曰此皆汝所當得者不必

辭有餘而以與爾鄰里鄉黨之貧乏者不亦可乎

一則與所不當與一則辭所不當辭故聖人皆教之以義  
看此一章須要曉得義字子華為夫子使齊義也冉子為其母請粟非義也夫子與之釜與之庾義也冉子與之粟五秉非義矣夫子又非之以君子周急不繼富即義之所在也原思為之宰與之粟九百義也思之辭非義矣夫子教以鄰里鄉黨此又義之所在也  
馮氏曰子華之使原思之宰非同一時

事也記者以其辭受互相發故係於此

子謂仲弓曰

仲弓聖門賢弟子也其父賤行惡雖是父賤而行惡然仲弓之賢自不可廢所以孔子一日於背後譬論他說雜文之牛固不可用為犧牲而所生之子却純赤色且又角周正如此便可用以祭山川矣縱然人欲不之用山川之神其肯舍諸夫子言此見得父之惡不能廢其子之善如仲弓之賢自當見用於世也



蓋以犁牛譬其父以其子之騂且角譬仲弓之賢以  
雖欲勿用山川其舍諸譬仲弓之必見用而不廢然  
此特論仲弓云耳非與仲弓言也大抵亦是當時  
人有以仲弓之父賤行惡而病之故孔子發此不然  
雖稱其子之賢反彰其父之惡宜非其子之所樂聞  
而聖人隱惡揚善之心宜不如此其瀆也 孔子當  
時只云云初不魯一字染着仲弓此亦是記者知其  
言之所為發而係之如此若有一字染着便不是聖

人之言辭且角謂其色既赤而又有好角也

回也其心三月不違仁

叟二條減六十字

此章之言為其餘者設仁者心之德非吾心之外又有所謂仁心之所存即仁之所存也人之所以不仁者私欲害之也蓋心德與私欲不兩立 三月不違仁者此心常存私欲不得而間之也日月至焉者私欲間斷之時多 張子內外賓主之言生於本文至之一字 過此幾非在我非謂過三月不違便是聖

人也言能過此勉勉循循之關則欲罷不能矣只是此關難過過此則聖人矣自顏子說過此幾非在我自學者說本註而不能已四字只是勉勉循循意幾非在我則聖人之地可至矣朱子曰學者須是撥得這車輪轉到勉勉循循便無着力處自會長進

由也果於從政乎何有

芟一條

由也果果則足以決大義定大事於俄頃之際賜也

達達則事至物來於可否之間迎刃而解觸機而中  
矣求也藝藝則設施措置應用不窮矣故均曰於從  
政乎何有 從政之義君者出治者也臣者輔治者  
也君者為政者也臣者從政者也然亦有不拘處如  
為政以德固是指人君言子奚不為政則亦指人臣  
言人君則未有言從政者

季氏使閔子騫為費宰

芟一條

季氏使人召閔子騫為費邑之宰閔子本心不欲仕

大夫之家况季氏又不義而富且貴者故因使者辭之曰你好替我辭了他若辭不得而再來召我則我必之汶上斷然是不往汶齊南魯北境上言出境而去非季氏使命之所能至矣始焉善為我辭辭之言雖婉終言去之汶上絕之之意甚決真有德行者審於進退之言也善為我辭焉人多以下文來解是泥集註殊不知註上文下一令字下文無言字如何接得去且善為我辭之辭辭今次之召也如有復

我是預却其後次之召也自是兩意

伯牛有疾

芟一條

有疾先儒以為癩雖不可知然以夫子斯疾之言玩之則其疾必有非常疾者 亡之命矣夫謂伯牛疾勢如此其死必然矣然其以此疾而死是誠命也不意此人乃有此疾不意此人乃有此疾不應有而有之非命而何然則非其不能謹疾而有以致之亦可見矣 命者莫之致而至是乃氣數使然而非常理

所可測也 斯人也而有斯疾也言其素有德行理  
不應有是疾也註云然則非其不能謹疾而有以致  
之亦可見矣言夫子既言其不應有疾則非惟其德  
行可知而其能謹疾亦可見矣 執其手者念平生  
之深契慨幽明之隔路而與之永訣也當是時聖人  
痛惜之意不能自己因嘆曰云 云所嘆之辭非永訣  
也永訣自是永訣下文是痛惜之辭

賢哉回也 芟二條

賢哉回也下文

云

云是其所以為賢也故終之曰賢

哉回也

所食者一簞之食所飲者一瓢之飲飲湯

也蕭然在於陋巷湫隘之中他人處此盖有不勝其  
無聊不平者矣而回也處之泰然獨不以是而改其  
所自得之樂則有以出於尋常人之萬萬者矣賢哉  
回也 雖窮居不損焉顏子豈以簞瓢陋巷而改其  
樂哉使顏子而富貴其樂亦猶是也

冉有曰非不說子之道

芟一條減三十六字



此章冉求之言蓋因夫子稱顏回不改其樂而發冉求曰求也之心不是不慕夫子之道而求以至之只是力之不足欲進而不能耳冉求此言乃自諉之辭而無復求進之心矣故孔子曰所謂力不足者非無所用其力也蓋亦遵道而行至於中途氣匱力竭而廢耳廢者不得不廢也所謂力不足者如此今汝乃畫地以自限耳豈所謂力不足者哉冉求自謂欲進而不能夫子非之而明其能進而不欲者乃所以激

而進之也悅者企慕欲得之意 中庸所謂半途而廢自廢也此之廢不得已而廢也語意自不同 今汝畫言你何曾有求進之力乃溺於怠惰安於小成自限其所至耳謂之畫者如畫地以自限也畫字在畫地上生來借作限字意用冉有所謂力不足者言其氣稟之弱雖欲勉焉以求至而於物欲之私有所不能自克冉求意思是認在中道而廢裏去今女畫是以今日之所至自滿不求造其極也或指冉求此

兩言便是自畫言其無復求進之意非也自畫是言其怠於用工只恁說是自畫則其失亦輕矣然即此言味之亦可見 謝氏曰以畫為力不足其亦未知所用力與使其知所用力豈有力不足者其未知悅夫子之道與使其知說夫子之道豈肯畫也 冉求曰非不悅子之道看來悅也未至必如顏子之欲罷不能乃為悅之深耳故胡氏曰使求悅夫子之道誠如口之悅芻豢則必將盡力以求之何患力之不足

哉

女為君子儒

芟二條

子夏之病在於近小既有近小之蔽則入於私而非為己之學矣故孔子以此教之然此亦必子夏初見孔子時事 女學為仁學為義但知其為吾性分所固有職分所當為盡吾事焉而已者為己也若學為仁為義而欲以求聲譽干利祿者便是為人也為己為人之分不于其迹而于其心迹則同心則異所謂

不同也所謂觀其所由也為己者欲自得於己為人者欲見知於人也君子小人同為此學者也一則是要自家好一則是要別人道他好蓋天理人欲同行而異情前輩有云古者腐儒今則皆盜儒矣嗚呼

子游為武城宰

減十字

武城魯下邑言魯君管下之邑若費則季氏邑矣窮鄉下邑字意又不同女得人焉爾乎只是問說你

為宰於彼曾得有立心制行之好人否不必說為政  
以人才為先子游不是取滅明輔政 曰有箇澹臺  
滅明者其為人也尋常行路必由大路不由小徑若  
非公事未嘗一至偃之室即行不由徑一節觀之則  
其動必以正而無見小欲速之意可知即非公事不  
見邑宰一節觀之則其有以自守而無枉已徇人之  
私可見滅明之制行如此真可謂好人而子游以是  
取之亦可謂之知人矣 飲射讀法之類飲自是飲

射自是射讀法相連字然古人飲多用射飲鄉飲酒  
或賓興賢能與蜡祭亦飲讀法者會民讀法使知所  
謹守也州長於正月之吉黨正於四季孟月之吉族  
師於月吉閭胥於既比皆讀邦法以是知為邑宰者  
亦然也 子游之取臧明固非只取此二事也舉此  
二事可見其為人也 註動必以正而無見小欲速  
之意有以自守而無枉已徇人之私兩句皆說出外  
來意該得廣

孟之反不伐 減二十九字

孟之反只奔而殿便分明是一箇功在所不得辭了  
反却耻以是自居歸在馬不進上真箇不伐想反之  
本心蓋曰戰敗而還主憂臣辱我又何故緣此占一  
功此皆忠厚之心所到 據莊周所稱則孟子反此  
一節亦是老氏之行但聖人取人之善以為世勸正  
不計其心云耳

不有祝鮀之佞

減二十七字



世衰俗薄不好德而好諛不悅賢而悅色雖以吾夫子之德之盛然不用於魯不合於齊沮於晏子子西毀於叔孫武叔其見疾於人亦屢矣故曰知德者希孰識其貴此章蓋有激而發故曰傷之也而字似與無虐瑩獨而畏高明之而字同宋朝之美美色也是體貌自然之美色與人為之令色不同

誰能出不由戶

芟三條減二十一字

戶者出入必由之舉世之人誰能出不由戶既知戶

之當由則道尤為人之所當由者也何故乃不由道  
邪 戶者人所必由之地道亦人所必由之理也恠  
而嘆之恠其知由彼而不知由此也

質勝文則野

章蔓三條減一百十三字

質勝文則質有餘文不足文勝質則文有餘質不足  
聖人之云者正欲學者損有餘補不足以至於成  
德之域也 質勝文者凡一言也任意率然而不知  
有語默之則凡一動也徑情直行而不知有進退周

旋之節此則謂之野人文勝質者品節詳明而忠誠之不足文物燦然而實意之反踈此則謂之史也必文與質稱質與文稱舉無有餘不足之患然後為君子君子與上文野字史字正相反夫質勝文則為野非君子也文勝質則為史非君子也文質彬彬然後君子意重在君子上君子則威儀文辭之中自有忠信誠慤者存忠信誠慤之表自有威儀文辭者在此之謂文質彬彬據本文是以成德者言自無有餘無

不足自不待損益 須用七分質三分文方是彬彬  
若以五分質五分文文質相半為彬彬則如五升水  
用五升鹽而味不得調矣此斷斷必然之理也故子  
貢所謂文猶質也質猶文也為失本末輕重之差

人之生也直

民受天地之中以生人既有此生則必得是所以生  
之理如耳目則有聰明之德父子則有慈孝之心此  
皆實理自然而無一毫之屈曲者也是人之生也直

矣生理本直若人自罔之則逆其生理而人之所以  
為人者滅矣理當死而猶生者幸免耳聖人警人之  
意莫切於此

知之者不如好之者

章

此樂字與樂斯二者之樂一般如顏子之樂又較深  
是安其所樂此朱子之說 知之者知有此道如父  
子知其當親君臣知其當義知之而已他自却未曾  
實用其力以求至好之者方是用力要得之樂之則

已得乎此理矣聖人但說此不如彼便是要人勉其所未至

子曰中人以上

中人以上者語之以上則其言易入而不為躡等中人以下者不語之以上而僅語以日用常行之道則其言亦易入而不至於躡等須看可以二字言此等可語上又一等不可語上兼天資學力說

樊遲問知

此章荅樊遲之問仁知是必因樊遲有信惑鬼神計較功利之失而告之專務乎人道之所宜至於鬼神則但敬之盡所以報事之禮而已而不誦瀆之以要福如此則是知務其所當務而不務其所不當務可謂知矣夫仁者先其事之所難而後其效之所得則其心一於理而不計其私可謂仁矣 務民之義先難後獲皆舉見成底說但未至自然地位務民遠鬼神分明是於是非上見得透故為智不惑於鬼神之

不可知謂吉凶禍福也 先難後獲分明是心一於  
理而無私欲之蔽故為仁 仁者先難而後獲是仁  
者之心如此先難言其心汲汲於是而不及乎他也  
先後猶緩急 惟知其為所當為者知者之事也無  
所為而為者仁者之心也

知者樂水仁者樂山

芟一條減三十八字更定次序

此章就仁知之喜好不同上見得其體之異而其效  
亦異也 知樂水仁樂山由此觀之知者動仁者靜



動則樂靜則壽樂壽據理而言 動靜以體言猶言

本質體段是如此

齊一變至於魯

芟一條

齊一變至於魯至孔子時之魯也此據齊魯之政俗而言聖人本心則皆欲變之以道但齊之變道也難魯之變道也易齊魯當太公周公時大槩一般但自桓公創霸之後至孔子時風俗遂與魯頓異故註云孔子之時齊俗云云二國之政俗有美惡者王霸之

異也孔子時之齊固非昔日之齊孔子時之魯亦非  
昔日之魯矣故皆須變施為緩急之序謂變齊所  
當急者在革其功利夸詐之習若修舉廢墜在所緩  
魯則修舉廢墜宜急若風俗本自近厚可以少緩又  
如變齊則至魯為急至道為緩正蒙第九篇曰魯  
政之弊馭法者非其人而已齊因管仲遂併壞其法  
故必再變而後至於道

觚不觚觚哉觚哉

減三十二字

觚哉觚哉言豈是觚哉觚哉此與水哉詞意不同此  
上有觚不觚字 看來孔子之時天下之物失其制  
者多矣而孔子獨舉觚而言蓋亦舉其一以見其餘  
即其小以見其大故君而失其君之道則為不君 云  
云是亦觚不觚之類也

仁者雖告之曰井有仁焉

逝雖訓往然須着箇使字陷誣陷之陷非自陷也

君子可得而逝也不可得而陷也蓋君子是有斟酌

的人非好仁而不好學者也故繼之曰可欺也不可罔也

君子博學於文

芟二條減六十八字更定次序

博學於文凡理之所載者皆文也文最廣而學貴乎博故曰博學於文禮即文中所載的理以其理之有規矩準則為人之所持循故曰禮向也多聞多見至博矣今則將來身分上踐履其實然方其學之也遠求近取旁搜廣訪至博矣及其將來行時却容不得

許多事項只照一箇是處直頭行將去故曰約之以禮也既博於文又約以禮道於是乎得矣何畔之有亦可弗畔言將與道契也在博文約禮之後如此勉循循而不能已則與道為體矣不曰與道契而曰亦可弗畔者蓋博文約禮學者事也 文謂詩書之所載與夫事理之所當然者皆道也君子博而學之則所知者皆道也禮則天理之節文即道之所存也君子於所博者一以是約之則所踐履者皆道也故

曰亦可以弗畔矣夫 文有千端萬緒博之極費工夫到約禮時件件都擇其精要者行之須味守欲其要字面 文與禮一理也就文物上為文就吾身之行處說便是禮博文者究聖賢之成法識事理之當然也約禮者動必以禮也博者在外約者約上身來多聞見者學之博慎言行者守之約博文不必件件都要行如行夏時乘殷輅如何便行得只是一一都考究得出約禮則是非禮勿視聽言動之類件件

都是我當行的亦是我得行的 弗畔兼博約說為  
長程子之說偏重在約禮故在圈外 或曰只約禮  
便自不畔道何用博文曰若不博文則不知禮之所  
在如聞見單寡則所約之禮亦未必得其大中至正  
之歸也

子見南子

芟一條

子路不悅其心是決然以夫子此舉為非其疑未易  
遽釋故夫子誓之曰予之所行若有所不合禮不由

道者天厭之天厭之夫南子之在衛君夫人也夫子見之見小君也在我有可見之禮則彼之不善我何預焉然此豈子路所能測哉故重言以誓之欲其姑信此言而深思以得之也饒氏曰子路氣粗見偏卒未易回巽言則不入故與之矢言

中庸之為德也其至矣乎

中庸之德德之無以加者也民鮮久矣非過則不及也或問道理二字如何分曰道是渾淪總括言理



是其中條理地道有山川草木之條理人道有仁義禮智信之條理

如有博施於民

末條和也之下有者字行文今削去

子貢有志於仁從事高遠未知其方故問如有博施  
恩惠於民使民無不因之以有濟如此可謂仁乎子  
貢此問猶疑其未足以盡仁也 聖莫聖於堯舜於  
此猶有所未足而豈止於仁夫仁者不必博施濟衆  
也但已欲立而立人已欲達而達人如此則天理周

流而不以物我間之可謂仁矣狀仁之體謂狀出仁之模樣如此然以已及人自然而然亦非學者所能遽及但能近取諸身云云只看仁之方字便見此未是仁以已及人地位非子貢所及也故又以恕之事告之論語說仁處不一然其直指大體者有二夫仁者已欲立而立人已欲達而達人此就愛之理上說仁也克已復禮為仁此就心之德而言仁也呂與叔克已銘是以已字作我字解以町畦不立為克

已以皇皇四達洞然八荒為天下歸仁如此說非惟  
與四勿不通亦對復禮不切蓋不知孔子之告顏淵  
是從心之德上論而專以所謂愛之理者解之故朱  
子不用然移之以解已欲立而立人已欲達而達人  
則無得而議矣大抵此銘亦不出仁者以天地萬物  
為一體一句 仁者以天地萬物為一體一句亦可  
當一篇西銘 已欲立而立人已欲達而達人亦克  
已復禮者之事也 通書云德愛曰仁宜曰義理曰

禮通曰智實曰信此雖皆以用言然以五者並言則其理自分曉況有德字冠於其上若韓退之發端便云博愛之謂仁行而宜之之謂義則以其發用之地而目為道體之全自是失真又如云中也者和也天下之達道也明反中庸之詞而實得中庸之旨蓋所以發中庸之奧使其體用之一原昭昭於後世也嗚呼精矣

述而第七

述而不作 芟一條

言我只是述舊初不自作始焉蓋我惟信而好古只見得古道在所當述而不容於有作耳然我之信古而傳述在古之人有行之者老彭是也我之信古傳述惟竊比於我老彭而已蓋孔子刪詩書定禮樂贊周易修春秋皆傳先生之舊而未嘗有所作也但認述不認作此便是謙故曰作者之謂聖述者之謂明夫子是只以明者自居也然又曰竊比老彭則愈謙

矣

默而識之

默焉不言而此理實得於心理雖已得於心而又加學習之功日知其所未知日行其所未行而無厭射之意至以此誨人又必期其人之有成略無倦怠之心何者能有於我哉言其無一有也所謂丘未能一焉曰何有於我哉見其汲汲於此惟日不足也在聖人已能而猶自以為不能何其汲汲也抑觀夫子他

日嘗曰予欲無言則是能默而識之矣又曰好古敏求則是能學不厭矣又曰未嘗無誨焉叩其兩端而竭焉則是能教不倦矣又曰為之不厭誨人不倦則可謂云爾已矣而今者之言如此非聖人之謙而何哉 識訓記訓存不忘也非着力記憶之謂謂能不為己有也學不厭誨不倦皆說自然底 識若讀為如字則意思淺讀去聲却有自得居安資深之意德之不脩 第三條立字有誤

日新之要有四修德也講學也徙義也改過也德必  
修而後成今也不修學必講而後明今也不講聞義  
能徙則善日益今也不能徙不善而改則復於無過  
今也不能改如此則德無由成矣學無由明矣善日  
損而惡日長矣尚何日新之有是吾憂也 德之不  
修以行言學之不講以知言聞義不能徙以為善言  
不善不能改以去惡言要之則德之所以修者此理  
學之所以講者此理聞義而徙者得此理於人而舍



已以遷之改其不善者自覺其非理則以理易之此二者又皆修德內事但不可就入在內聖人語意是四件 德者吾所得於天之理也仁義禮智是也此理在吾心而不能不壞於物欲故必常去修理也然後德成於我所謂立也註云德必修而後成如此

學必講而後明須是常去講論他習其所已知究其所未知如此則於所學之理無不明者矣 義與善不同義者事之宜也是箇時中恰好處不善分明是

惡不止於不合宜而已 能是四者則日新而馴致  
乎聖賢之域不然則絕望矣亦終將為下愚之歸耳  
豈不可憂 憂字只在四箇不字上南軒推說一重  
然須貼日新意

子之燕居

芟二條

聖人陰陽合德不但其應事接物之間各得其宜至  
於一身之容色亦無不各得其宜如在鄉黨而恂恂  
者此鄉黨之所宜也執圭而鞠躬過位而色勃此執

圭過位時所宜也至於閒居既非見賓承祭之時亦  
非應事接物之際故其容則申申然而舒泰其色則  
天天然而和悅然不曰申申天天而一則曰如二則  
曰如者以見聖人德容氣象有非言語可以名狀者  
姑借此以擬議之耳 燕閒居也息也申申即舒也  
天天即愉也但申申舉一身而言天天獨指見於面  
者言圈外程子註不分容與色且中和字亦微泛

甚矣吾衰也

雙三條

孔子云甚矣吾衰也何以驗之蓋吾向也氣盛之時  
常夢見周公而今也久矣吾不復夢見周公即久不  
夢周公觀之可見我之氣已衰而志已灰也甚矣不  
夢周公可見其衰久不夢周公可見其衰之甚孔  
子不夢文武而獨夢周公者渠所志只是做周公若  
志為文武則亦非無將之心矣故作春秋主於尊周  
他日有曰吾其為東周乎亦只要做周公而興文武  
之道也非欲得文武之位也 集註云孔子盛時以

氣言也則無復是心者志也而亦無復是夢者夢也  
故因此而自嘆其衰之盛者指氣言也孔子是就無  
夢上驗其一身氣運之衰朱子是就夢上尋出志字  
蓋夜之所夢晝之所思也所思處即志

志於道

芟二條

學莫先於立志然有非所當志而志者則所趨不正  
矣必志於道則所適者正而無他岐之惑行此道而  
有得於心則謂之德德而不守之則始雖為我得終

必失之故又必據於德則始終惟一而有日新之功矣至於心德之全而私欲盡去所謂仁也仁而不能依之則私欲有時而復萌而心德之在我者有不全矣自志道而據德自據德而依仁則本之在內者無不盡矣然又當游心於禮樂之文射御書數之法則有以盡乎物理周於世用而其雍容涵泳之間非辟之心亦無自入矣不然則本之在內者雖無不盡而末之在外者猶有未周是亦君子分內之欠事也

故必先志道據德依仁而又游藝焉則本末兼該內  
外交養而君子之道尚何有加於此 志於道欲得  
此道也 據於德守其所得而不失也 依於仁則  
心德之全而與之為一無事守矣 游於藝藝雖末  
節道之全體固無不該也游者玩其理也其味甚長  
理在事物為道道得於心為德德之全為仁藝則  
以餘力及之所以博其趣也 依者不違之謂心與  
理一相依而不相捨之意仁則私欲盡去而心德之

全也私欲未盡去心德猶未全未全只可言德未可言仁

自行束脩以上

人但自行束脩以上之禮禮物雖有厚薄之不同要皆有求見之誠者也我則未有不教之者除是不知來學則我不得而往教之耳

不憤不啓

芟一條

教人者固不可有倦教之心而學者亦不可無受教



之地故救人之法倘非學者意欲通而未能通則不為之通其意非學者辭欲達而未能達則不為之達其辭凡物有四隅者舉一可知其三若不能以三隅來相反證則其不能自力而了悟之途猶塞便不再告也 或曰若能以三隅反又何待於復曰所復者又別一件道理非以三隅復之也

子食於有喪者之側

此章見聖人當哀自不以樂而勝哀夫子食於有喪

者之側臨喪而哀雖食自不至飽不特此耳夫子若於此日哭人之喪則一日之內餘哀未忘自不能歌學者於此二者可見聖人哀樂中節性情之正也

註哭謂弔哭謂哭他人之喪也若自家喪豈但是日不歌哉自彼而言則曰有喪者自我而言則曰臨喪

子謂顏淵曰

芟一條減五十九字更定次序

子謂顏淵曰世苟用之則出而行世苟舍之則退而藏隨其人之用舍而行藏安之若此者惟我與爾有

此便見其非他人所能與 用之則行我無必於行也舍之則藏我亦無必於藏也隨寓而安耳味此兩句意全是說進退脫洒而無所係累意 用之固行矣至舍之則藏舍之固藏矣至用之則又行此二句又當如此看 用舍不必言用舍吾道行藏亦只是身之行藏非道之行藏也然聖賢身出則道與之俱伸身退則道與之俱屈有是夫猶云能然也不是有其具 大抵去就之間最可以觀人所造聖人無我

顏子幾於聖人亦能無我故其安於去就之際畧同  
命不足道也註命為中人設若中人未至無我地  
位或進而主於行到行不得然後安於命或退而主  
於藏到勢不容已然後以命而起唯孔顏無我則處  
於行藏之間者安之而無意必固我之私矣孔門三  
千舍顏子之外無復可同者 聖人無我顏子未達  
一間故孔子進他一步許其同能然者實所以進之  
也非互相標榜而已若稱許之則不必在其面前云

云矣如回也庶乎及語之不惰之類當非面語之詞  
此云我與爾却是面語面語則有引教意非褒飾之  
也

子行三軍則誰與

減十字更定次序第五六條舊合為一

子路曰用行舍藏夫子既與回同矣若行三軍則所  
與同者誰歟子曰若徒恃其勇徒手搏虎徒手馮河  
而為虎所噬為河所溺死而不以為悔者我不與行  
三軍也我所與行三軍者必其臨事而能敬慎以處

之好謀而有斷能成其謀者也夫子言此所以抑其勇而教之然行師之要實不外此子路蓋不知也

暴虎馮河便有死之理故曰死而無悔蓋方其暴虎馮河時便已自擬其死而不以為悔矣若已死了聖人又何待說不與 暴虎馮河有勇而無義者也臨事而懼能以義勇者也事自外來者也謀自己出者也 臨事懼好謀成便是能用其勇此以素行言非謂行三軍時也 好謀而成謂好謀而能成之非好

謀而有成也故註云成謂成其謀全是能斷人多是  
初間會謀後來無合殺只是輕躁苟且好謀而成成  
之全在決斷故曰蓄疑敗謀沈毅為要 自負其勇  
註與抑其勇而教之之勇皆指血氣之勇言

富而可求也

聖人明知富不可求此獨開闢其辭以曉人耳然此  
章言富不可求是以命言非以義言也言命者為衆  
人設耳聖人於富貴貧賤一安於義而已命不足道

然安於義則其得與不得惟命而已義在我命在天  
但聖人無不柰何而受之之意耳此要須識得富  
若可以人力而求之歟則雖執鞭之士至賤也然可  
以求富吾亦為之矣誠如有命者存而不可以人力  
求則惟從吾所好而安於義理耳何必徒取辱哉  
從吾所好與吾亦為之吾同孔子自言也所好者義  
理也經世書曰夫人不能自富必待天與其富然  
後能富人不能自貴必待天與其貴而後能貴則富



貴在天也夫人之能求而得富貴求而可得者也非  
其可得者非所以能求之也云云如知其非已之所  
能得非人之所能與則天下安有不知量之人耶

子在齊聞韶

斐二條

韶舜樂也舜之後封於陳為之後者得用先代之樂  
自陳敬仲奔齊故韶樂在齊夫子周流四方適在齊  
而得聞韶樂之音焉蓋深有契於心者因而學之至  
於三月之久心一於是至不知肉味既而嘆曰向也

但聞韶樂之美猶不意其作樂之至於如此之美也  
蓋其三月忘味之後有以究極其情文之脩而凡韶  
樂之所以美處聖人蓋深得之矣故不覺其嘆息之  
深如此 集註情文之脩文謂聲容也情謂聲容之  
實也味夫子之言蓋其中有不可形容之妙存焉

冉有曰夫子為衛君乎

芟二條減七十八字

君子居是邦不非其大夫故衛君之事不可以面斥  
而古人之事則可以反觀故子貢舉夷齊為問以卜

夫子之意曰伯夷叔齊何人也曰自是古賢人也謂之賢人則是已許之矣子貢又以賢則賢矣設其心猶有悔焉尚有可議也故復問曰當其時二子之心亦有所悔乎曰二子之心正所以求仁也既而各得其志焉則安於窮餓矣何悔之有子貢於是乃悟曰夷齊兄弟遜國者也衛君父子爭國者也夷齊所為見與於聖人衛輒所為得罪於聖人矣故出語冉有曰夫子不為也 伯夷叔齊之讓若天王判之當屬

伯夷國本伯夷之國也故孟子一則曰伯夷二則曰伯夷不及叔齊權衡審矣

飯蔬食飲水

大抵聖人之心渾然天理天理之所在聖人之心則安之故一天理之外無餘物或富或貧聖人無乎不安也故發此章之言亦示人以內重而見外之輕意我之飯蔬食飲水飲食如此其菲薄夜卧無枕曲其肱而枕之寢處又如此其荒涼困亦極矣只是我

之所樂初不以是而有所加損亦自在其中矣若彼不義而富且貴者勢利雖盛天理何在於我觀之如浮雲之無有吾心固不為之動也

加我數年

吉凶消長之理進退存亡之道全以天時人事言此道理具在易書學易則有以明之分而言則吉凶消長天時也進退存亡人事也胡氏註及會講都認差聖人生知其心自與易理相契安而行之其身自

與易理相符若無待於假年以學易而僅得無大過而猶言此者蓋深見夫易道之果無窮且使人知其不可不學而又不可以易而學也不可不學者聖人猶藉之以圖無過人其可不學乎不可易而學者聖人又有待於假數年以學易然僅得無大過人其可以易而學哉 孔子聖之時可見其早與易契

子所雅言

執禮謂所執之禮與詩書一類也

葉公問孔子 芟二條減一百三十字第二條湊合

葉公問孔子於子路問者問其為何如人也子路不  
荅蓋葉公不知孔子必有非所問而問者故子路不  
荅也及孔子聞子路之不對葉公之問因自狀其為  
人以告之曰汝當時何不荅葉公云孔某之為人  
也  
是箇篤於好學的人於理有未得則發憤以求之憤  
之極直至於忘食及其既得而樂也樂之極雖事之  
在所可憂亦忘其憂矣是以一憤一樂二者循環俛

焉日有孜孜而不自知其老之將至如此聖人此言  
但自言其好學之篤耳云云有非聖人不能及者抑  
聖人自言雖只自狀其為人然其所以教子路之意  
亦在其中矣此語恐亦非葉公所能領畧者意在教  
子路居多全體至極純亦不已之妙註此兩句不  
可分貼須到不知老之將至後方見小註所解或未  
然蓋夫子一憤一樂循環於終身可見其無一善之  
或遺是謂全體無一善之不造其極是謂至極又無



一時之或息是謂純亦不已本文三句要一氣讀下  
我非生而知之者

此必當時人見夫子無所不知而以生知稱之故夫  
子辭之曰我非生而自知此理者我乃好古而汲汲  
以求之故能知其理者聖人是以學知者自處然即  
好古敏求之言而深味之則其生知之實亦可見矣  
此古字與信而好古之古同即詩書禮樂之類不  
可說聖人好古敏求只是禮樂名物之類聖人是總

說生而可知者義理耳聖人已不自認了又安得偏指敏求者為禮樂名物之類尹氏之說自非正意乃後學議論之辭然亦實理也

子不語怪力亂神

畧更次序

聖人所常言者詩書執禮所罕言者利與命仁也又有絕不道者怪力亂神是也蓋怪異暴力悖亂之事非理之正在所不當言鬼神雖非不正又有未易言故聖人皆不語也然不曰言而曰語者又有分別蓋

人雖言及已亦不答也故曰答述曰語自言曰言而  
本註一則曰聖人所不語二則曰不輕以語人可見  
怪者山精水妖天地變異之類力者如烏獲之能  
舉千鈞孟賁之生拔牛角孟說之扛鼎是已悖亂者  
臣弑其君子弑其父之類也鬼神者日月星辰之所  
以升降風雨霜露之所以慘舒四時之所以代序萬  
物之所以榮枯者是也語怪則啟人惑語力則啟  
人爭語亂則啟人悖理逆倫之事語神則啟人以馳

心於不可測知之境是故聖人謹之 孔文子欲攻  
太叔疾訪於仲尼仲尼不對此不語亂也子路問事  
鬼神子曰未能事人焉能事鬼此不語神也斥子路  
曰暴虎馮河死而無悔可知其不語力魯論二十篇  
所記嘉言善行多矣獨無一語涉異者且曰索隱行  
怪吾弗為之可知其不語怪 南軒曰聖人一語一  
默之間有教存焉

三人行必有我師焉

子曰學者但有心於為己無往而非進德之地便做  
三人同行亦必有為我師者在何也三人同行其一  
我也彼二人者一善一惡我則擇其善者而從之師  
彼之善為我之善其不善者而改之恐懼修省恐亦  
有是惡也從之謂從他樣做改之謂不與之類也然  
此亦姑以一善一惡對言以見善惡皆我師耳若兩  
人皆善則皆當從兩人皆惡則皆當改若一人之身  
有善有不善吾亦從其善而改其不善無往而非師

也師者教我者也善吾所以為法固師也惡者吾因之而改其惡亦由彼之有以啟道我是亦教也故皆為我師 聖人言同行者之可師以其善惡皆為我益也

天生德於予

生賦也言天賦我以如是之德聖人不自名言然亦果有以自見其得於天者獨厚矣夫天惟無意於我則已今也天既賦我以如是之德則必嘿相我於冥

冥之中彼桓魋雖欲害我其亦如我何哉必不能違  
天害已也違天謂逆天意故與天忤也謂天固欲佑  
之魋固欲害之是與天忤也魋其能勝天哉 天字  
以主宰言

二三子以我為隱乎

芟二條

諸弟子以夫子之道高深不可企及而今所以教吾  
徒者不過只是日用常行之際威儀文辭之間而已  
是必於其高深者有所隱而不以教人也故夫子釋

之曰二三子爾之心疑我為隱乎吾其實無所隱於  
汝我無一所行而不昭然以示爾二三子者是丘之  
所為然也吾豈有隱於爾乎蓋夫子所謂無行而不  
與二三子者言其作止語默無非教也見之雖若卑  
近而高深者存焉道豈有不在於是乎顧學者有所  
不察耳以此言之聖人果無隱矣雖然聖人自不肯  
隱亦不能隱使善觀聖人者得而隱之乎然使學者  
自家地位若淺則聖人雖不隱學者固自隱矣 吾



無行而不與二三子者是丘也意曰無一而不以教人者莫丘若也 註云作止語默無非教也又云與天象昭然莫非至教而通書亦曰四時行百物生莫非至教正蒙又曰糟粕煨燼無非教也何不曰道而皆曰教蓋以其常以道理示人而言也易曰夫乾確然示人易矣夫坤隤然示人簡矣此天地之教也

作止語默無非教也不可貼在無行而不與二三子句上此與上文俱安在二三子以我為隱乎上然所

謂無行而不與二三子者其實含作止語默無非教也之意

子以四教

夫子以四件事教人四者何其始教人以學文使之講明夫天下之義理其次教人以脩行使其所講明者一一見之於躬行又其次則教人以忠與信使其所行者必盡已之心而一一以實為之誠以不先之以文則理有未知何以責其行不次之以行則所知

亦虛文耳然行雖善而心有未實則亦偽耳故聖人之教必兼是四者而四者之序又如此忠就已上看體也信就事物上看用也忠信疑通管文行前章主忠信疑亦兼知行

聖人吾不得而見之矣

芟三條

聖人者大而化之者也君子者大而未化者也善人者不踐迹而自不為惡者也有恒者性也有常重厚朴實人也有恒字要淺說方見在善人之下不然反

在善人之右矣究其所行猶有未善在善人不踐迹  
則天資亦甚粹美豈可淺淺看得見有恒者斯可  
矣然所謂有恒者無他有為有無為無盈為盈虛為  
虛約為約泰為泰如是質實無偽方能有恒如使本  
無也而自以為有之狀本虛也而自以為盈之狀本  
約也而故以為泰之狀如此者雖能偽為於一時而  
無可繼於後難乎有恒矣然則所謂有恒者只是質  
實無偽耳人惟能有恒則由此而進於有善無惡之

域而聖人君子之地亦可以馴致矣故夫子特言無恒之失以申有恒之義其示人入德之門也

子釣而不綱

孔子或為養與祭祀賓客之需未免於漁獵然其漁也以釣貪吾餌者取之而已而不用網絕流而盡取之其弋禽也只取其飛者宿者不射之為出其不意也此可以見聖人於取物之中有愛物之仁待物如此待人可知小者如此大者可知 釣弋皆男子之

事雖聖人有時為之魯人獵較又非特少貧賤時耳  
網即大繩弋即生絲不曰網而曰網者以其大繩  
屬網也不曰射而曰弋者以其生絲繫矢而射也漢  
文帝身衣弋絺弋字義同

蓋有不知而作之者

減一百五字

天下之物莫不有理故為其事者當先知其理理即  
其事之所當然者也蓋有不知其理而妄作其事者  
我却無此多聞人之言其言有善惡也則擇其善者

而依之行多見人之行其行有善惡也善者記之以  
行惡者亦記之庶乎有以備參考而不昧於所從如  
此則雖未能實知其理然亦可次於知而不至於無  
知妄作矣 聞見之寡不足以求知多聞而擇多見  
而識所以求知也若知者則所知無一之非實此方  
是求到那知處故次之 孔子言未嘗妄作蓋亦謙  
辭者以其非聖人之極至也

互鄉難與言

畧更次序

互鄉之人習於不善難與言善有童子請見門人疑之以為不當見也 童子見謂得見也 子曰釋之也人既一旦自潔而進見我則但許其今日之潔耳固不能保其往日所為之善惡但許今日之進見耳亦不復許其既退而為不善也蓋既往之事既不追將來之事又不逆以是心至斯受之又何為已甚乎潔修治也 註自其今日之求見可知 若追其既往逆其將來而不與其潔已以進則非中庸之行而



為已甚矣

子曰仁遠乎哉

芟一條減五字

仁遠乎哉且虛說不可以註仁者心之德非在外也  
貼在此句內須安在下句集註云都是解我欲仁  
斯仁至矣而仁遠乎哉之意自見非在外也見不  
遠意凡在外者求之則有得不得縱得亦無如是之  
速惟仁是可自必底隨求隨得一念方動應念而生  
我字虛說不必指聖人身上說集註全不提聖

人此語所以甚言其近且易使人知自勉而不憚於用力也人固有以仁道遠而難至者故夫子發此以示之

陳司敗問昭公知禮乎

蓋昭公素習於威儀之節當時以為知禮而司敗復舉以為問即此而度其意是蓋持其吳孟子一事而不以為知禮故問之以試孔子孔子答之以為知禮不過就其習於威儀一節而言耳 司敗聞孔子之

言心不以為然及孔子既退適遇孔子弟子巫馬期者司敗乃迎揖巫馬期而進之曰我聞君子不黨於人由今觀之君子亦黨乎為何魯君娶於吳魯與吳皆姬姓是為同姓以其同姓而諱之乃謂夫人為吳孟子夫同姓為婚知禮者不為也君而可為知禮孰不可為知禮乎而夫子以為知禮非黨乎周女曰姬商女曰子齊女曰姜楚女曰芊吳孟子在魯只稱孟子今見於春秋卒是也謂之吳孟子蓋當時譏諷

之詞故特冠以吳字見其終不可掩也使若宋女子  
姓者然宋子姓也又係吳以別之吳與子字相軋矣  
所謂欲蓋而彌彰也魯人既是諱之只用于字不必  
着吳字矣今着吳字意是他國譏諷之語故加一吳  
字以暴其事耳 巫馬期述司敗之言以告孔子既  
不可自謂諱君之惡又不可以娶同姓為知禮故受  
以為過而不辭曰丘也幸哉人莫不幸於不聞過我  
苟有過人必知之既知於人則聞於已而可改圖於

後日矣豈非幸乎 孔子既受以為過而不辭則司  
敗所斥吳孟子之事固在所不辨矣一則不失君父  
之私一則又不失天下之公議

子與人歌而善

孔子與人同歌而見其歌之善者則且自停其歌而  
必使之復歌使之復歌者欲得其詳而取其善也然  
後却從而和之和之者喜得其詳而與其善也與人  
歌共歌也反之彼獨歌也和之我自歌也反復也復

覆也去聲讀差 氣象從容故能使反而後和誠意懇至使之反有自下之意也謙遜是自認其不如彼也審審欲得其詳不掩人善使彼得自見其善也

子曰文莫吾猶人也

若論文辭無分曉我也相似人若論躬行實踐之君子則我全未之有得文者如說仁說義說得有次序有條理便是躬行君子則曰仁曰義一一體之於身見之於事也此皆聖人自謙之詞而足以見言之易

行之難言易在所緩行難不可緩也欲人之勉其實實者言之實躬行君子是也莫疑辭猶俗言無分曉辭則自謙意則欲人知言行之難易緩急而勉其實也

若聖與仁

芟二條減二十二字

當時有稱夫子聖且仁者以故夫子辭之曰若聖與仁則吾豈敢當哉抑以仁聖之道為之於已而不厭以此誨人又不倦則亦可謂如此而已耳然為不厭

誨不倦非實有此仁聖者不能夫子雖不居仁聖之名而愈見夫子有仁聖之實也公西華適在側聞夫子此言而有悟焉乃嘆曰正唯弟子不能學也世固有未能盡仁義而教人仁義者但不倦却難故集註只提不倦說聖者大而化之德極其盛而又無其迹也仁則心德之全人道之備正是德之盛處仁聖自然者也為不倦誨不倦是以勉然者自處然於不倦不倦味之則又見其自然矣夫子之自



謙與子華之體認當如此分別

子疾病

芟二條

子路請禱而夫子問以有諸蓋欲子路深省夫禱之理苟知其有是理則凡素行有愧於神明者宜用禱而夫子無用禱矣子路未達故曰云 既曰丘之禱久則死生付之命矣 周公亦嘗為武王行禱子路之禱固不為非但不宜請於病者既以為請則夫子不得不辭之然夫子不直止之而但告以無所事

禱之意則禱之禮亦有不可以夫子之故而遂廢者矣聖人雖在病中而其言之從容曲折亦如此真造化所在也 上下神祇上之天神下之地祇也行禱五祀謂行禱禮於五祀也無其理則不必禱此註當用在丘之禱久上

奢則不遜

凡禮得中為貴奢之弊則僭上陵分而不遜儉之弊則朴焉無文而固陋奢儉皆各有害然儉之害小而

奢之害大故與其不遜也寧固固則已分有未足不  
遜則溢於禮法之外矣 奢儉二字便是失中不遜  
與固皆其害也

君子坦蕩蕩

君子循理不以得失利害為心故坦蕩蕩小人役於  
物則患得患失之心無時而已故長戚戚 坦蕩蕩  
長戚戚皆兼內外言 坦蕩蕩猶云光燦燦不可以  
坦字當常字對長字 心廣體胖此只做仁者不憂

說大學本意較深

子溫而厲

第三條湊合減四字

聖人容色隨時不同而無一之不中和時乎溫也溫而厲時乎威也威而不猛時而恭也恭而安是皆中和之氣見於容貌之間者然却本於全體渾然陰陽合德 人之德性本無不脩言兼陰陽之理而中和而氣質所賦鮮有不偏言其氣或偏於陰或偏於陽也則其見於容貌者亦偏矣惟聖人全體渾然陰陽

合德則氣質亦中和而於本然之德性無所障礙矣  
故此中和之氣見於容貌之間云非容貌有中和  
之氣乃中和之氣見於容貌也 全體渾然陰陽合  
德言其氣質之不偏陰陽以氣言德即陰陽是也氣  
虛容貌實 恭而安按堯典述堯之德始之以欽繼  
之以安安恭而至於安則所謂篤恭而不顯者矣堯  
孔雖窮達不同恭德之安則一也

泰伯第八

泰伯其可謂至德也已矣

芟二條減二十五字

泰伯其可謂至德而無以復加者矣何也固以天下讓於商而不取且又隱然不露形迹而民莫得而稱之夫以天下之大讓於人而人又莫知其為讓此非其德之至極而何哉 觀集註所序見太王所以有翦商之志者一則以商道寔衰二則以周日彊大三則又以孫昌之聖有王天下之理也 又云泰伯不從此正泰伯之所以讓天下處至於與仲雍逃之荆

蠻者特以遂其父傳歷之志蓋知太王翦商之志既不可回傳歷之志又不當拒故去之以滅其迹非固以無君之罪而嫁之也若讓天下處却在前之不從上此亦因其不從故有是事也自太王乃立季歷以下至武王乃克商而有天下皆是叙周家來歷見得武王只是終太王翦商之事耳非固以文武之有天下實泰伯之所讓也泰伯若從太王翦商之志則天下為泰伯有矣故曰三以天下讓非因後來文武

有天下而推原以歸於泰伯也其實是魯以天下讓也註云夫以泰伯之德當商周之際固足以朝諸侯有天下矣何以見之泰伯採藥荆蠻而人翕然歸之遂成吳國使其襲周邦之盛而為之豈不足以有天下故夫子斷曰以天下讓也泰伯之讓季歷正與伯夷之讓叔齊其事迹與心正相契合而註不言者以泰伯之以天下讓不在此也故集註不曰即夷齊讓國之心而曰即夷齊扣馬之心云蓋其心即



夷齊扣馬之心夷齊之所執者君臣之義也泰伯所  
執者亦君臣之義也而事之難處有甚焉者夷齊之  
於武王有犯無隱其去就可以顯其迹泰伯處父子  
之間則當有隱無犯其去留不可以露其迹此所以  
民莫得而稱之者也至德只在可取不取上而帶又  
泯其迹意不可全重在泯其迹上若重在泯其迹則  
文王之至德又說不去了 或曰人知泰伯之逃荆  
蠻耳而不知其讓國也人但知其讓國也而不知其

讓天下也此說不是全說以天下讓季歷而與所謂其心即夷齊扣馬之心者相背矣不必依此章一則見泰伯全君臣之義所謂三以天下讓也二亦足以見泰伯全父子之恩所以民無得而稱也重在君臣之義至父子之恩亦帶說對待舉不得泰伯若當武王時必不為武王之事文王若當武王時必不如武王之暴當時紂既投火死了何故又要斫其首而梟之他雖天下罪人亦做你底君父來何至此之

甚湯之於桀亦放之而已此孔子所以獨謂武王未  
盡善 若季歷又生子昌有聖德太王恐亦未敢遽  
擬其有天下也未知朱子所述云云果出何書蓋史  
記也然史記安能得聖人之心於千載之上耶少微  
鑑載雙湖胡氏之說及通鑑前編金氏之辨似於義  
甚精宜考之

恭而無禮則勞

此章重在禮字蓋禮者天理之節文即中之所在也

凡事貴乎得中不中則各有其弊如恭美德也恭而無禮以節文之則不當恭而恭矣其弊也勞慎亦美德也慎而無禮以節文之則不當慎而慎矣其弊也  
憊勇亦美德也勇而無禮以節文之則不當勇而勇矣其弊也亂直亦美德也直而無禮以節文之則不當直而直矣其弊也絞  
勞憊亂絞只就無禮處說不是無禮了方勞憊亂絞  
勞所謂病於夏畦也憊所謂畏首畏尾也亂所謂犯上作亂也絞如證父攘

羊是也

君子篤於親

此段不着何人說舊以屬之上文而通為一章張子依之至吳氏以為當自為一章而疑其為曾子之言朱子亦然之故今不連上文讀 在上之君子若能厚於其親如父母及諸父昆弟之屬處之各盡其道則於其親篤矣夫親親仁也上仁則民亦興於仁而各親其親矣若能於故舊盡忠厚之道以處之而不

忘其平生之好則為厚之道也上厚則民化之亦不  
偷而各厚於故舊矣此親字與君子不弛其親之  
親同兼父母諸父昆弟子姓說故舊即與故舊無大  
故之故舊同篤字重不遺字輕篤於親不遺弛於  
故舊自有輕重張子曰人道知所先後云云者言知  
所輕重則恭慎勇直施於親舊者自無過中之失而  
民化德厚矣然較牽強

曾子有疾

芟一條

曾子有疾疾者病之革也曾子平日以為身體髮膚受之父母不敢毀傷至此自幸其得免於毀傷故召在門弟子而詔之曰你輩開了被看我底足開了被看我底手其有不全者乎且我之保守此身極難小旻之詩曰戰戰然恐懼兢兢然戒謹我之戒謹恐懼也如臨深淵而恐其墜如履薄冰而恐其陷其焦心勞思惟恐其毀傷有如此者幸未有毀傷至於今日自今以後我知得終免於毀傷矣小子語畢而又呼

小子者以致反覆丁寧之意蓋曾子最是箇懇篤底人說這語便要入於人之耳貼於人之心如語孟敬子亦曰人之將死其言也善都是要他記得都是丁寧之意

孟敬子問之

芟一條減二百一字

曾子有疾孟敬子往問其疾曾子將有言以告之又恐其忽之而不之識故先自言以警之曰鳥之將死其鳴也哀人之將死其言也善而今我將死之言善



言也子其識之想孟敬子平日是箇留心於細務而不知大本底人故告之曰道雖無所不在然君子所重乎道者只有三事三者何不動容貌則已一動容貌便遠了暴慢之氣而容貌皆得其道不正顏色則已一正顏色便要近信而無色莊之偽而顏色皆得其道不出辭氣則已一出辭氣便要遠鄙倍之失而辭氣皆得其道君子所重在此三事而已是皆修身之要為政之本所當操存省察而不可有造次顛沛

之違者也若夫籩豆之事器數之末道之全體固無不該然其分則有司之守而非君子之所重矣此君子對有司而言大槩指孟敬子一輩人說不必專以德言 集註言自言也此解曾子言曰之言字與其言也善言字無預將死言善曾子自言也謂之自言者此是曾子說自家事無預於敬子然所以警敬子之聽也 人窮反本故言善 註反本者人性本善也 道字該得廣所貴者三事而已動正出三事無工

夫善惡未分直至遠暴慢上方見所貴乎道之意容  
實而貌虛此以一身言顏實而色虛此以面上言信  
實也表裏如一之謂實鄙凡陋也其失小倍背理其  
失大 遠字近字不必以為貼貴字必遠必近方為  
貴也如已動容貌而遠暴慢是所貴也 此三句身  
上事盡之矣而心亦在其中但亦就孟敬子所及者  
而語之若正論修身則須自誠意正心來 集註學  
者所當操存省察 云 云在此三句外此三句舉見成

者而言曾子以是告敬子便見敬子當操云云修身之要即為政之本也要字本字貼貴字意對遵豆之

事言

曾子曰以能問於不能

芟二條減十九字

以己之能問人之不能以己之多能問人之寡能其有也不自以為有而若無然多其實也不自以為實而若虛然人若以非禮犯之我本直而曲在彼也已亦安然受之恬不與較曲直昔者吾友蓋嘗服行於

此矣但曰昔者吾友嘗從事於斯便見今之無其人  
也 以能問於不能四句以知言有若無貼問不能  
句實若虛貼問於寡句能不能就所造之高下言所  
問者終是其不能處或未能自信處 顏子之問初  
不知我是能彼是不能也但彼雖不能我所問者却  
是彼之能處非此事我本能也又却去問人那人又  
是不能者如何答得却枉費了工夫非聖賢之實心  
下問 犯而不校是所存者大故人犯着他他自不

覺得此句對上四句獨以行言力行之事多而獨以  
不校言者於此逆境尚能善處是為能行人所不能  
行則其他可知矣此曾子之善立言也 惟知義理  
之無窮不見物我之有間須要分曉若於以能問不  
能內着箇物我無間之心則此只是不耻下問地位  
如云人之善亦猶我之善我問之美忝似又非所以  
論顏子也若於犯而不校內着箇義理無窮之心則  
顏子之不校者乃是內省恐怕是我之失所致故不

與校耳若果無失又將校之耶亦非所以論顏子也  
此與謝氏不必得為在己失為在人戾謝亦圈外註  
若是如謝說則不校後猶當做工夫且既曰犯便是  
失在他人矣如何用得不必得為在己失為在人  
之說而謂但知義理之無窮乎

可以托六尺之孤

減三十二字

有人於此其才可以托六尺之孤為幼君之輔可以  
寄百里之命一國之政皆自其手出其才之過於人

如此且又臨大節所係底所在他之所以輔幼君攝國政者卓然堅定而不可以利害奪之恁樣人可謂之君子人與看來才節兼脩如此信乎其為君子也盖有是才而無是節則終歸於小人有是節而無是才則亦僅得為善人而已皆不得為君子君子才德出衆之名所謂君子不器者也 國有長君而為之輔猶未見其難托孤方難國之政事君相共之猶未見其難攝政方難平時托孤寄命猶未為難至臨大



節而不失其寄托之重方見其難 臨大節大節字  
以事變言不就君子身上說謂臨大節所在利不苟  
就害不苟去也托孤寄命分為兩事看兩可以字可  
見托孤必兼寄命如周公之於成王是也亦有寄命  
而非兼托孤者如高宗在諒陰政事聽於冢宰又如  
季任為任處守是也 臨大節不可奪有生者有死  
者不可以生者為優死者為劣看事勢如何魯子只  
言其節操之堅耳蓋承上文二可以字說來恐不消

說到死處然成敗利鈍非所逆睹亦不可拘定可  
以才可以也不可奪節不可奪也丈夫所立須要到  
招之不來麾之不去地位方是的當

士不可以不弘毅

芟二條減一百二十四字

此章之言曾子平日之所學終身之所得者皆不出  
乎此謂士不可以不弘且毅為何士者之擔子重而  
路頭又遠惟其任之重非弘不能勝其重矣惟其道  
之遠非毅無以致其遠矣是故不可不弘毅然果何

以見其任之重而道之遠蓋仁者人心之全德大而  
三綱五常小而百行萬善無一之不統於是而以為  
已任必欲身體而力行之此其任不亦重乎且其身  
任是仁也一息尚存此志不容少懈直到死而後已  
此其道不亦遠乎 看集註必字及不容字後四句  
全說任重而道遠朱靠在士者用工處若說得欠斟  
酌便是弘毅了須知任重道遠是所以當弘毅處弘  
是有擔當毅是能耐久弘毅之實一也 已任之任

與任重之任字同皆作死字看 一息尚存註醫家  
以一呼一吸為一息

興於詩

芟二條減一百二十五字更定次序

學者所造必先有以興其好善惡惡之心然後其善  
實有諸已惡實無諸已而能卓然有立不為事物之  
所搖奪既能立了然後進而至於義精仁熟而成矣  
然其所以興所以立所以成又皆各有所由得是故  
其始之興也必於詩而得之何也詩本性情有邪有

正其為言既易知而吟咏之間抑揚反覆其感人又易入故學者之興也實得之興固以詩其立也又於禮而得之何也禮以恭敬辭遜為本而有節文度數之詳可以固人肌膚之會筋骸之束故學者之立也得之興立成三字皆以己能者言謂其興也得於詩其立也得於禮其成也得於樂興起其好善惡惡之心時猶未及乎立也至於立則真有是善實無是惡矣立猶是自守者也至於成則義精仁熟而自和

順於道德無所事守矣此三段自始學至於成德者也興於詩興此心也立於禮立此心也成於樂成此心也只是此一箇心興於詩見詩之當學也立於禮見禮之當學也成於樂見樂之當學也又須細認興立成字興於詩者以詩能興人也立於禮者以禮能立人也成於樂者以樂能成人也故集註上三截皆言詩能興人禮能立人樂能成人也下三截方言興於詩立於禮成於樂詩本性情有邪有正

人之性情有邪正詩亦有邪正邪正二字起下文善惡字其為言既易知註云詩辭明白而近人情也抑揚反覆註云抑揚謂聲音高下反覆謂前後重覆翻倒禮以恭敬辭遜為本而有節文度數之詳亦不是以本對文言節文度數即恭敬辭遜之節文度數也此兩句猶上節云詩本性情意詩自是詩性情其所本禮自是禮而恭敬辭遜其所本也恭容也敬心也辭讓心之發也節則無過文則無不及度有長短

之制數有多寡之宜肌肉也膚皮也筋所以聯屬乎  
骸骸則脛骨也骨其大者註云人肌膚本有所會筋  
骸本有所束至此愈堅固執禮之力也 卓然自立

者有定見有定力善必為惡必去自家扶豎得起而  
外物倒折我不得故曰不為事物所奪言不能奪其  
所守也 更唱迭和者聲律相為唱和也此所以節  
夫歌舞八音也聲律只在歌舞八音之內舞雖無聲  
律然其節亦協 可以養人之性情以其中和也蕩



滌其邪穢去其物欲之汙也消融其渣滓又使道理之勉強而未純熟者皆消融而無餘迹也義精知之至也仁熟行之至也和順於道德從容不待勉強也仁義以人性言道德以仁義之本原言天道也此三句大學終身所得之難易先後淺深也難易先後淺深者詩易於禮禮易於樂興為先立次之成最後興者淺立者深而成又其深者也天下之英才不為少矣以資質言特以道學不明故不得有所成就以

學力不至言也 語錄謂禮指文樂指本非也集  
註立禮起句便云禮以恭敬辭遜為本不見全是文  
解成樂起句便云樂有五聲十二律不見全是本解  
大抵詩禮樂皆在外 朱子謂是三者只是游藝一  
脚事史氏曰雖云然興詩即是志道時事立禮即是  
據德時事詩禮雖是藝中所該然方興方立只可為  
游之之漸未可遽謂游止於如此也直至成樂方是  
依仁以後時事此即游於藝之極至處至此則興詩

立禮之味亦熟而游藝之實可見矣又曰非興無志  
非立無據非成無依興雖在詩而所興者則是志道  
立雖在禮而所立者則是據德成雖在樂而所成者  
則是依仁又曰藝是修治道德仁之器具道德仁是  
頗放藝之處所

民可使由之

民指凡民而言也蓋以斯道覺斯民者聖人之本心  
也然不能使人人皆覺者則非聖人之本心也勢也

故孔子說民但可使之由於事理之當然而不可使之知其所以然蓋所當然者如父當慈子當孝之類皆民生日用之事固衆人所能行者故能使之由若夫父子之所以慈孝則皆出於天命之自然與人性之固有者自非中人以上者未足以語此故不能使之知 聖人本心不但使民由之更欲使民知之也但不可得耳故云 此亦以氣稟所拘之故故曰人皆可以為堯舜是謂論性不論氣不脩也若論聖人

明明德於天下之心何所不至

好勇疾貧亂也

芟一條

人之生亂有二有亂在我者有亂雖在人而致之在我者此章可見聖人說人之好勇若不好勇若不好勇則猶安分未便至亂雖疾貧若不好勇則不至於肆暴而橫行亦未便為亂惟其好勇而又自疾其貧而不安分必作亂也人而不仁固在所憎疾但不可至已甚使之無所容其身其勢必致亂也蓋仁者之心雖有善

惡之殊然其生亂則一然則人固不可自為亂亦不可以自取亂聖人言生亂之道有此二端所以示人當知所警戒也

如有周公之才之美

此言人之有才而不可恃也自古之有才者莫若周公然假使真有周公底才那樣美設使以已有是才而自驕以人無是才而吝焉則大本已失其餘皆不足觀矣況無周公之才而驕吝者乎要足此句方見

本文特舉周公之意而與程子此甚言驕吝之不可也意相協 其餘指才使驕且吝則德喪矣

三年學不至於穀

第二條元與首條合為一乃破題也

世固有為干祿而後學者亦有學問之功始加而利祿之念隨之者夫惟三年之久從事於學但知學以謀道而初無求祿之心如此者不易得也 久於謀道而不謀食者斯為難矣 謀道不謀食為已不為人孔門顏曾閔開之外少有不為祿而仕者故孔子

嘆之也

篤信好學

芟二條減三百七十七字更定次序裁剪湊合

士君子要篤信要好學要守死要善道此四者要相  
為用而不可有一缺焉者也 篤信守死未分是否  
必好學然後所信者是必善道然後所死者是守死  
未必死以死言之所守者堅也善道謂能全乎道也  
去就出處皆在此四者外此是士之本領 集註不  
篤信則不能好學不守死則不能善道下因乎上也



然篤信而不好學則所信或非其正守死而不足以  
善道則亦徒死而已是上因乎下也 無有用工篤  
信而不能守死者故曰守死者篤信之效是有守也  
亦無有用工好學而不能善道者故曰善道者好學  
之功是有學也或曰如此則當云有守有學而不曰  
有學有守矣蓋篤信好學者學之事守死善道者守  
之事 危邦不入不危斯入矣亂邦不居不亂斯居  
矣非一於不入不居也去就之義潔猶有就一邊在

會講云天下有道則邦皆安而不危皆治而不亂  
無非可入可居之邦故見如此則孔子去魯適衛去  
衛適齊為隱乎為見乎故朱子曰有道不必十分太  
平然後出無道不必十分亂然後隱此說最長若依  
會講則是國有道不是天下有道矣 邦有道貧且  
賤焉非甘貧賤也人自不我用不得不貧賤也故可  
耻耻者耻其無可行之道也邦無道富且貴焉希世  
投合而已亦耻也耻其無能守之節也 上邦字指

國對天下此邦字單言指一世而兼國 無可行之  
道無能守之節以出處言而去就在其中 不入不  
居則見則隱此惟有學有守者能之若邦有道貧且  
賤焉邦無道富且貴焉則是無學無守矣祇可耻耳  
危邦不入亂邦不居無道則隱非但有守亦是有  
學而見得透也天下有道則見非但有學亦是有守  
而果於行也以此見得世治而無可行之道不可專  
為無學世亂而無能守之節不可專為無守蓋此兩

句自是說他去就之義不潔出處之分不明而原其由則是無學無守也

不在其位

減八十二字首條亦字或宜作故字

有是位則有是政政乃有位者所當謀也若不在乎其位則其政乃吾分外者亦不謀其政也 此章本意只是言不在公卿大夫之位者不當謀公卿大夫之政即此言而推之則上下之間各有分限天子不當治三公之職三公不得兼諸侯之事諸侯不得理

大夫之政以至左不得以侵右右不得以侵左皆不在位不謀政之意也 此位字大抵以臣言不必說不在君之位則不謀君之政若君大夫問而告者則有之矣此是言外意 謀是思所以處之非但泛論而已故註以任字代之

師摯之始

芟一條減三十一字

闕雎之亂在詩則為首章在樂則為卒章故曰亂曰闕雎之亂洋洋乎盈耳哉舉終以該始言自始至終

皆美盛也 離騷首篇亂曰註亂者樂節之名凡篇章既成撮其大要以為亂詞也

狂而不直

聖人說凡人氣質不齊不能以皆無病然有是病亦必有是德然後可以入於善以理論之狂雖是病然猶幸其直也今也狂而不直侗雖是病然猶幸其愿也今也侗而不愿慳慳雖是病然猶幸其信也今也慳慳而却不信只存得不好處其好處又都無了將

焉用哉然聖人無棄人今日吾不知之矣甚絕之之辭然使其知為聖人所絕而改焉是亦不屑之教誨也

學如不及

言人之為學惟日孜孜而競尺寸之陰其用功已如有所不及而其心猶踈然恐其或失之而竟不能及也學如不及以功言猶恐失之以心言聖人之意蓋謂今日之學既無此工夫而心中猶泰然不知恐懼

則將如之何

巍巍乎舜禹之有天下也

減十三字

夫一命一爵之榮猶能盛人之氣而奪人之志故世間尋常的人有得一資半級而自恃侈然以權自張者何其卑也巍巍乎舜禹二聖人也以匹夫之身一旦而享天子之貴而能處之超然不以為樂若無所與於天下一般此其氣象視尋常人何啻萬倍其巍巍可知巍巍言其大過人也若以有是位而遂盛其



氣則自卑小矣原來舜禹也只是內重而見外之輕  
巍巍高大貌此高大以氣象言下文是有天下而  
不與則天下為小舜禹之心為大有以色乎天下而  
天下不足以縈其心獨舉舜禹舜禹本是匹夫一  
旦有天下實出望外而却不以為意尤見其巍巍  
大哉堯之為君也

堯一條減七十三字

惟天為大天於萬物無所不覆也惟堯之德有以準  
乎天而同其大堯之德惟與之同其大故其德之所

被廣遠無盡蕩蕩乎無能名亦如天之不可以言語形容也於不可名言之中只有箇成功之巍巍文章之煥然者可言耳若堯之德塞乎天地之間即中庸所謂洋溢乎中國施及蠻貊凡有血氣者莫不尊親是也何可名言觀上條文勢巍巍指天蕩蕩指堯對天之巍巍說 蕩蕩乎民無能名已見堯之所以為大處至下節 云其德終不可名亦可見堯之大也 蕩蕩民無能名此正是堯與天同其大處非謂德

之所施也況此德字就君德言下文云此特君德  
中指其一二而已其餘難以言語盡也正是民無能  
名處新安之說未審或曰成功巍然文章煥然似  
亦盡矣猶為不可名乎大哉聖人之道洋洋乎發育  
萬物峻極于天豈止一箇成功一箇文章便了得耶  
但成功文章亦不可小小說曰巍巍乎曰煥乎大抵  
大人分上無小事但孔子之意則以為此不足以盡  
堯耳成功是事業成就處如百姓昭明黎民於變

時雍是也文章是所以致成功底成功以績效言  
文章以其所施布之天下者言 文章禮樂法度也  
禮樂教也法度政也 邵伯溫皇極經世解曰堯得  
天地中數故孔子贊堯曰惟天為大 云云 煥乎其有  
文章揚雄亦謂法始乎伏羲而成乎堯蓋自古極治  
之盛莫過乎堯先乎此者有所未至後乎此者有所  
不及考之歷象稽之天時質之人事若合符節嗚呼  
盛哉味此言則知氣數亦當世下一世矣後世之欲

復古者不其難矣乎程子亦曰唐虞之治不可復矣  
或曰無為而治者其舜也與此獨贊堯之盛何也惟  
其有堯治功之盛是以有舜治化之盛因舜之無為  
益以見堯之大也

舜有臣五人

減二十六字

舜得臣五人而天下自治舜恭己無為矣則人才何  
其盛乎禹平水土兼宅百揆而天下之民得平土而  
居之矣天下之庶職亦咸熙矣稷播百穀而天下之

民舉無饑矣契敷五教而天下之民自相親睦矣皋  
陶明刑而天下之民無敢作非矣伯益焚山澤而天  
下之民無禽獸之害矣此舜之所以得臣五人而天  
下治者也 武王曰予有佐治之臣十人所以克商  
而造有周之業者此十人之力也則十人亦盛矣  
孔子之言蓋主周言曰古語云才難不其然乎我看  
武王得臣十人而周室安人才之盛如此考之於古  
惟唐虞交會之際堯舜聖人繼作而五人者實為之

佐而天下治視之有周為獨盛耳降自夏商皆莫能  
及也然十人之中邑姜又為婦人耳以此言之謂有  
十人看來只是九人而已亦未滿十數也則人才之  
難得也信乎其然矣然武王以十人之力而克商有  
天下猶未若文王之可以取而不取也故孔子因武  
王之言而及文王之德曰文王三分天下有其二只  
一反手而天下悉為周有矣文王不取乃率商之叛  
國以服事殷周之德其至德乎才難一條夫子本

為周言而援及唐虞耳當時門人聽言者亦甚高識  
便敢把舜之五人為過於周之十人故以五人列其  
十人之上以起夫子之言而不以為嫌蓋人才不以  
多寡為盛衰顧其人物地位何如耳

禹吾無間然矣

減二十二字

禹吾無間然矣何也儉者或一於儉而不知所豐豐  
者或一於豐而不知所儉是皆不無可議禹於己之  
飲食則薄之至於鬼神則致孝焉享祀必豐潔也已



之常衣服則從麗惡至於朝祭之黻冕則致美之焉  
自處之宮室則從卑陋至於民間之溝洫則盡力焉  
凡若此者豐其所宜豐儉其所宜儉豐儉各得其宜  
縱欲指其隙而議之無得而議之矣故曰禹吾無間  
然再言無間然所以深美之 黻冕只是祭服不兼  
朝服言

子罕第九

子罕言利與命與仁

芟二條減一百四十二字

夫子罕言利及天之命及人之仁蓋計利則害義夫  
子罕言之者正義不謀利之心也命之理微仁之道  
大夫子罕言之者蓋非中人以上者不足以語上不  
欲人之忽近而驚遠也罕言者不容不言特不多  
言罕言命者蓋以理言之則聲臭俱無以氣言之  
則雜揉難辨是其理甚微也朱子曰命只是一箇命  
有以理言者有以氣言者理精微而難言氣數又不  
可盡委之而至於廢人事故聖人罕言之命之理微

此理字不對氣而言乃兼言也 仁兼理事說統百  
行該衆善其道最大也數言之不惟使人躐等亦使  
人有玩之之心故罕言楊氏謂夫子只言求仁之方  
仁之本體終未嘗言非也罕言非全不言也已欲立  
而立人克己復禮為仁此豈亦求之方耶 命在天  
最玄妙故曰理曰微仁該衆善道者衆理之總名故  
曰道曰天曰命曰仁即性與天道也仁者性之全體  
命即天道之流行而賦於物者

卷六  
達巷黨人曰

減二十二字

黨人所謂博學者蓋指才藝之類亦未為知孔子也  
只言諸般都學而無一般名家 五百家為黨達巷  
黨人謂達巷黨之人也猶言互鄉童子大哉二字意  
在博學是美之無所成名又是惜之難以無所成名  
為大也 聖人之大精粗本末一以貫之黨人特就  
粗末上譽聖人夫子聞黨人之言乃承之以謙謂門  
弟子曰他說我博學無所成名蓋以我不專執一藝

也不知他欲使我何所專執以成名乎專執御乎專  
執射乎然則我將執御矣夫射御皆藝之卑者而御  
尤其卑者夫子不處其他而獨欲以御自處是皆謙  
詞然亦可見道之無所不在雖射御之卑聖人亦屑  
為之而孔子之大亦於是乎可見其一節矣聞人  
譽已承之以謙也大哉博學此人譽之而孔子却只  
言吾何執云云初不以博學自處若為不聞者是謙  
也執御之云要非聖人之真心也聖人果欲執御

以成名者乎亦見達巷黨人之不足以知夫子矣蓋道無往不在豈必專攻一藝以成名哉承之以謙之說姑釋其詞而未暇及其餘也

子曰麻冕禮也

雙一條

古人之冕以緇布為之禮也今也以其細密難成改用絲為之用絲比之績麻為之者較為省儉儉雖非禮然無害於義猶可從也吾從衆若夫臣與君行禮拜於堂下者禮也而今却拜於堂上是泰也泰則害

義之甚不可從矣雖違衆吾寧從下不顧也以此觀之可以見聖人處世之權衡以同而異處學者即是推之凡世俗之事無害於義者皆可從或有害於義決不可從也

子絕四

子絕四何也凡人之私起於意遂於必留於固成於我四者常相為終始而夫子則無意無必無固無我自始至終絕無一毫之或私焉蓋聖人之於事一任

天理而已 本文無循環意集註推說只用前註

勿視勿聽勿言勿動者賢人之勉然也無意無必無固無我者聖人之自然也

子畏於匡 減一百四十三字

子畏於匡弟子懼子曰群聖人之統傳在文王今文王既沒矣則斯文獨不在於斯乎言其在我也夫斯文之興喪皆天也使天將喪斯文則我後死者不得與於斯文而文不在茲矣今既得與於斯文而文在



茲則是天未欲喪此文也天既未欲喪此文則我之  
一身斯文之所在也斯文之所在天意之所在也匡  
人其如予何 子曰天之未喪斯文是猶望其達也  
非是止欲著書以傳來世也此與吾為東周之意同  
太宰問於子貢曰 減一百六十字更定次序

太宰問於子貢曰夫子聖者乎不然何其於禮樂射  
御釣弋獵較之類無一之不能也是太宰以多能為  
聖也子貢曰固然是天縱之而將入於聖者然聖之

所以為聖者却不全在於多能又兼得多能耳固  
天縱之將聖固字不必做實字解與又字相應太  
宰官名或吳或宋未可知也當時不但魯有太宰吳  
宋亦有太宰故云太宰所謂聖指才言亦只是以  
多能言才正指鈞弋獵較之類其說最淺殊不知多  
能乃才中之末事耳子貢所謂聖兼才德言之聖無  
不通多能在無不通中最小事或以才字貼多能  
多能當不得才字存於心者為德見於用者為才凡

建功立業設施措置經綸大猷無不是才多能特其餘事耳故曰聖無不通非指德為聖也非專指德為無不通也即夫子鄙事之言觀之可見多能當不得才字 子聞之兼聞太宰之所問子貢之所答也故註云非以聖而無不通也 太宰以多能為聖是以多能為出於天非人所可學子貢之意亦然及夫子言吾少也賤故多能則以為由學而通非天之所生矣乃推聖字不居謙也下文君子多乎哉不多也此

二句不是謙以多能非所以率人故另起一意子  
曰君子多乎哉不多也畢竟君子之所重者自有在  
也露出君子字回避聖字也 此章凡四人之言惟  
子貢之言為的夫子之言前段是謙已後段是誨人  
太牢固不足以知夫子琴牢所記亦未為深知夫子  
也 琴牢亦曰夫子嘗謂吾因不為世用故得以習  
於藝而通之也以琴牢所聞證之夫子吾少也賤故  
多能者尤信不必說是弟子記夫子此言之時子牢

因言云只是門人記夫子此言又以子牢之言實之此或是正意吳氏註亦圈外也

子曰吾有知乎哉

斐一條

當時必有稱夫子無所不知者故夫子辭之曰吾有知乎哉實無所知也但是有鄙夫來問於我在他雖是空空如也却不敢以其愚而忽之所以告之者務必罄吾所知發動其兩端而無一之不盡焉我只如此而已矣有何所知而或者遂以為無所不知耶此

聖人謙已之意然能扣兩端而竭焉於此亦可見其無不知矣蓋聖人雖不自聖而實有莫掩其聖處

鳳鳥不至

芟三條減十字

夫子嘗曰明王不興天下莫能宗予此即鳳鳥不至河不出圖以徵聖王之不興聖王不興誰其用我故曰吾已矣夫

子見齊衰者

減七十四字

雖少必作言齊衰者冕衣裳者與瞽者其年雖少於

我我亦為之起此正意也集註云或曰少當作坐此  
又後一說當看或曰二字見之雖少必作過之必  
趨不可以雖少對過之須以見之對過之說見冕  
衣裳者而作趨未見其為聖人見齊衰者與瞽者而  
作趨方見其為聖人

顏淵喟然嘆曰芟三條減一百三十五字更定次序

顏淵之在聖門學既有得因喟然嘆曰甚矣夫子之  
道無窮盡無方體仰之庶幾可及則見其愈高而不

可及鑽之庶幾可入則見其愈堅而不可入瞻之已在前似乎有方所矣及趨而前則忽焉在後而莫之為象夫子之道其高妙如此 高堅前後是全無入頭處後因夫子善教方得其所以然猶不能如夫子之自然處 高堅前後就夫子之道言卓爾就顏子所見言只是此一理向來摸索不着如今却見得在眼前然猶是見得未能至得 如有所立卓爾謂日用事物之間此箇道理有定在初無彌高彌堅在前



在後者矣 所立卓爾就行上說專說知固不是兼  
知行又不是蓋顏子是博文約禮進進不休才見得  
箇卓爾在 既竭吾才此是就博約上着力末由也  
已方着力不得 如有所立卓爾猶出於力索也若  
至於化則無事於力索矣要見得高堅前後是一節  
卓爾是一節卓爾猶大也至於化又一節 所見蓋  
親不是認得而已也就是行得只是不得如夫子之  
自然純熟而神妙也 言見得已親切而猶未能與

之為一也所謂顏苦孔之卓也 所見益親益字猶云甚也

子貢曰有美玉於斯

減三字

子貢以夫子久懷寶不仕故為此喻意其為不沽者故夫子釋其疑曰沽之哉沽之哉重言之明其必以沽也但汝欲我求價而沽則我所未然我却是待價者也待價而價未至其不沽也又何怪哉

子欲居九夷

薛敬軒先生邵陽縣重修廟學記云予嘗行天下登  
名山涉大川覽天地之高迥極萬物之變化然後有  
以驗是道之大無不包而細無不入初不以遠近而  
有間也聖人之道即天地之道其流行充塞於宇宙  
間亦豈有遠近之間哉昔吾夫子欲居九夷門人惑  
之殊不知九夷雖遠固不能外是道以有生聖人所  
在即道之所在又豈有不化之人哉今去聖人僅二  
千年不問海內外華邦蠻區愚夫小子皆能道吾夫

子之號而起尊信之心由是愈見其道之大焉居夷之言非偶設也

吾自衛反魯 按集註置詩於樂之上則知以雅頌為樂之詩歌者未然須詩樂平說殘缺謂樂失次謂詩也

子在川上曰 芟四條減二十一字

逝者如斯夫至不舍晝夜不可分兩截看 此章言道體無須更之或息所以示人體道當無須更之或

息也故曰自此以至終篇皆勉人進學不已之詞

不舍晝夜舍字去聲讀為捨者誤與次舍屋舍之義  
同為止息也

譬如為山

減三十一字

此喻人之為學廢於自怠成於自強也只是用為山  
九仞功虧一簣之意而演之耳

語之而不惰者 心解知也力行行也而不惰重在力  
行上但由於心解

子謂顏淵曰惜乎吾見其進也

聖人之惜大賢有進學之功無自棄之失 既曰進止二字說見上章當不可以未見聖人之止之說為解孔子之意謂回之學進進不已使假之以年當入聖域矣而不幸短命以死殊可惜也

子曰苗而不秀者有以夫

夫穀之生自苗而秀自秀而實乃為有成然苗而不秀者有以夫秀而不實者有以夫孔子言此以見人

有始學而不至於發達者亦有發達而不至於成就者然則學者要自勉不可以如穀方苗而秀者自止必以既秀且實者自期彼其始學而不至於發達者始學而遂止也故不發達發達而不成就者至發達而止也故不成就若能自勉而進進不已未有不底於成者始學而不至於發達者是猶入門而未升堂者也發達而不至於成就是猶升堂而未入室者也後生可畏

減一百十八字更定次序

後生年富力強足以積學而有待其勢可畏安知將來之不如我之今日乎然此亦顧其用力何如若或不自勉把好時節都挨過了至於四五十而無善聞於人則終為庸人之歸耳斯亦不足畏也已無聞謂無聞於人也此章意在年紀上年富力強力精力也強健也老則衰矣積學有待有待只是足以積學意若四五十則無待矣如云不亡何待法語之言

芟五條減八十一字



以正理而告之此樣言語人所敬憚能無從乎從之  
未為難依正言而改其失斯為貴寬容巽順而與之  
言恁樣言語無所乖忤能無悅乎然悅之未為難能  
抽繹其所言之理斯為貴改之與繹之二之字都  
是閑字若以繹之為繹巽言則改之為改法言乎此  
之字正與不若儉而不脩之為愈之之字同悅而不  
繹則全不足以知其微意之所在從而不改則亦面  
從而已此樣人已甘為下愚之歸而終無自新之路

矣吾亦無如之何

三軍可奪帥也

以三軍之衆而拱護一帥宜不可奪也然三軍之勇  
在人勢有所不及人有所不一則帥可奪也至於匹  
夫之微自守其志勢孤力獨似可奪矣然匹夫之志  
在己我自家所守要如此雖千萬人無所用其力不  
可奪也 此章文勢如中庸國家可均中庸不可能  
也之意勉人自立也

衣敝緼袍

芟一條

大抵學先要不以貧富動心有箇重內輕外之意然後可與進道若有耻惡衣惡食之意則識趣卑下無望其能有進矣然此亦進道之資耳若專挾此為能則志有所局無復遠大之望矣 集註於衣敝緼袍一節云子路之志如此則能不以貧富動其心而可以進於道矣須看可以進道意下文何用不臧便是此意 始言何用不臧者以其可進於道也後言何

足以臧者以其不復求進於道也

知者不惑 芟一條臧五十六字

此皆以成德者言若無後篇仁者不憂一章則此所謂進學之序及後章所謂成德為先者俱無矣同是一樣智仁勇但以智者居仁者之先是學之序也可以智者等俱為進學者之人

可與共學 芟一條臧十二字

可與共學只是有志要學的人其實未曾為學也適

道却又學得正 知學方可與共學知所往方可  
與適道能立方可與立能權方可與權 可與立則  
於理之常者已盡之矣未可與權謂於理之變者有  
未敢必也如伯夷叔齊可與立者武王周公可與權  
者節節皆曰可與者此亦為君子會友輔仁而言

唐棣之華

減十字

詩言豈不爾思室是遠而以人言也夫子只借詩之  
言而反其意其實不曾指說出朱子註云蓋前篇仁

遠乎哉之意人固有思而不能必至者難言何遠之有故知其以理言但時文中也要先鶻突說幾句然後專向理上去今則無人如此解直截說理上去了

鄉黨第十

孔子於鄉黨

孔子於鄉黨恂恂如也似不能言者只是一意相連說與後節足縮縮如有循一樣語勢或於此分言貌者非矣或以集註云恂恂信實之貌遂以此為指

貌以本文謂似不能言有一言字遂以為指言真未  
達哉夫所謂信實之貌此貌字虛如大學瑟兮惻兮  
者恂慄也恂慄本指嚴敬之存於中者言安得有貌  
然狀釋字義之法當如此也似不能言者以形似言  
安得為無貌且以賢智先人者不但言語其氣貌亦  
自是一樣矣便便言唯謹爾言貌亦不相離

其在宗廟朝廷

減十二字

集註詳問貼在宗廟極言貼在朝廷似可蓋在宗廟

難着極言字在朝廷難着詳問字若非入太廟每事問一章則朱子於此亦無由下箇詳問字只用明辨解矣

朝與下大夫言

集註既引王制上大夫卿下大夫五人則不可謂孔子當時為大夫有在其上者亦有在其下者 踧踖如也又且與與如也正是恭而安之意此節言其視聞聞侃侃者又不同矣 此節記孔子在朝廷事上



接下之不同事君事上也與上大夫言而閭閻亦事上也一說以君對上下大夫則君為上而上下大夫俱為下以上大夫對下大夫則又自有上下之別也不必以上大夫附君俱為上而只以下大夫為下也君召使擯

此是方承君命為擯之時頓改常容也 躡盤辟貌說者以為盤旋曲折之意而吳氏程以為足盤桓似不能行者大抵盤是不舒也辟其屏辟不寧之意洪

武正韻註亦曰屏也今之表體後有所謂不勝屏營之至

揖所與立

所與立謂同為擯者也只謂吾國之臣僚賓所使則謂之介此是賓主方相見之時也 朱子曰古者賓主相見之禮主人有擯賓有介賓傳命於上介上介傳之次介次介傳之末介末介傳之末擯末擯傳之次擯次擯傳之上擯上擯傳之主人然後賓主相見

中間更有自上擯傳至上介以及於賓一節 周禮云主君命上擯請問來故蓋雖知其來朝不敢自許其朝已恐其或為他事而來示謙也上擯受君命而傳之次擯遞傳至末擯末擯傳至末介末介以次繼傳至於上賓賓命上介復命復以次傳之擯而達於主君然後主君進而迎賓以入 依周禮行人註則先傳主人之命而出次傳賓之命而入於是復傳主人之命以復於賓而主隨出迎賓以入也 依朱

子則只是賓傳命而入於是賓主乃相見蓋朱子之言偶然只舉其後一節耳其首末委曲自有周禮在當依周禮為詳

每損相去各三丈六尺

每損相去各三丈六尺  
在主君之東南西面

每損相去各三丈六尺

每損相去各三丈六尺

每損相去各三丈六尺  
在主君之東南西面

朱子曰揖左人傳命出也揖右命入也 孔子是時  
蓋為次擯揖者揖而傳之以命也故云揖所與立所  
與立者皆本國之臣僚同為擯者也若末擯傳之末  
介則不可以左右言 揖只是拱起手而以命傳付  
之非如今日之相揖也今世所傳射禮之揖為可證  
此節重在衣前後襜如也若揖所與立左右手則  
不必聖人獨然九為次擯者皆然言手動而身不動  
也故衣自襜整

趨進翼如也 此時主已延賓而入為擯者從其後而

趨入以有事也

賓退必復命曰 此蓋只主人送賓出就館之時未必  
一見成禮而遂送歸其國也

入公門

此節歷歷有次序始於入門繼則及所立所履進此  
則過虛位矣又進則升堂矣已則降堂以至復位矣  
蓋自始至終名中其節也使擯執圭升車之類皆然

此一節記孔子在朝之容無餘蘊矣

立不中門

中門謂當棖闌之間君出入處也朱子曰棖如今衮頭相似闌當中碍門者今城門有之古人常揜左扉人君多出在門外見人當棖闌之間為君位○又曰疏云門中有闌兩旁有棖中門謂棖闌之中然則門之左右扉各有中所謂闔門左扉立於其中是也依朱子上二說則中門者不在二扉之中乃在各扉之

中也一邊是棖一邊是闌故曰謂當棖闌之間也闌門左扉君立其中豈不只是一扉之中耶在右扉之中則左邊是闌右邊是棖豈不謂當棖闌之間邪蓋門凡兩箇棖一箇闌也或者多不之察以為兩扉之中如此則止說當於闌為可矣何謂當棖闌之間小註與大註牕合也又與由闌右之說合



饒氏曰棖是大門兩旁之木如今尺壁相似闌是中  
間兩扉相合之處又有一木常設而不動東西兩扉  
各有中君出入則皆由左出則以東扉為左入則以  
西扉為左士大夫出入君門則皆由右出以闌西為  
右入以闌東為右然雖由右亦不敢正當棖闌之中



但挨闌旁而行蓋避君出入處也

過位色勃如也

芟一條或四十九字

門屏之間間字亦要分明屏之外門之內也饒氏曰  
門屏之間謂治朝也但天子外屏其屏在路門外諸  
侯內屏其屏在路門內則寧立之處天子當在門外  
屏內諸侯當在屏外門內此為不同耳 門屏制何  
如曰樹小牆於當門以蔽內外也 人君寧立之處  
所謂寧也朱子曰古者朝會君臣皆立君立於門屏

之間 饒氏曰古無坐見臣下之禮至秦君尊臣卑  
始有君坐臣立之制孟子曰舜南面而立

屏氣似不息者

未嘗不息但似不息者作此題雖極狀其恭敬不寧  
亦要恭而安意

出降一等

既和而踧踖餘敬終不忘也蓋在君所可以敬勝和  
不可以和勝敬也

執圭鞠躬如也

執圭鞠躬一條是指在所往聘之國執圭云云也故遂繼之以享禮有容色而註亦曰既聘而享

上如揖

芟一條

既曰平衡而又有上下者步趨之間其手微有上下也上下高低也

享禮有容色

減二十三字

享禮公獻也私覲公事已畢也享用圭璧庭實新

安曰此之用圭璧即玉帛之玉與上文執圭不相妨  
彼乃命圭也 庭實謂皮幣輿馬之類 朱子曰享  
禮乃其君之信私覲則聘使亦有私禮物與所聘之  
國君及其大臣然此私覲專主獻其君言不及其大  
臣也小註及其大夫之說非正解也

君子不以紺緌飾

減七字

此一節記孔子衣服之制 君子指孔子而言猶言  
君子有三變君子之厄於陳蔡之間亦指孔子孔子

不以紺與緋二色為常服之領緣蓋齋服用紺飾喪服用緋色此不以飾者飾常服也蓋齋自有齋服之飾喪自有喪服之飾常服自有常服之飾此謂不以齋服喪服之飾飾常服也莫說非正色既非正色如何齋喪用之

紅紫不以為褻服

減七十七字

紅南方間色紫北方間色間色不正且近婦人女子之服紅紫不以為褻服則朝祭之服可知此本文露

出褻字之意

當暑袷絺綌

當暑着單絺綌之衣也必先着裏衣表絺綌而出之於外欲其不見體也蓋暑服雖宜於輕淺而亦不宜於見體袷絺綌而表出之此暑服之制

緇衣羔裘

羔二條

不但暑服冬服亦有其制蓋禦寒莫如裘裘必有衣以楊之於外夫子緇衣則羔裘也使緇衣與羔裘以

黑色相稱素衣則麤裘也使素衣與麤裘以白色相  
稱黃衣則狐裘也使黃衣與狐裘以黃色相稱此冬  
衣之制然聖人之或羔裘或麤裘或狐裘非苟且隨  
意而服之也蓋羔用之於視朝麤用之於視朔與受  
聘享狐用之大蜡息民本文不重在此此又添一意

麤裘長

斐一條

至於麤裘用長長則溫也裘雖要長右袂却要短人  
之作事用右手短右袂所以便作事此又麤裘之制



也

必有寢衣

補舊在明衣條下

然齋主敬不可解衣而寢又不可着明衣而寢寢衣之制如何其長也一身有半其半蓋以覆足

狐貉之厚以居

然褻裘以何為之狐貉之毛最為深厚用以私居取其適體也狐貉之厚謂裘也此又褻裘所宜用之制也

去喪無所不佩

減六字

至於佩玉之類除是居喪不佩若去喪則無所不佩  
王者君子之所比德至於齔礪之屬君子之所有事  
而不可缺亦在所佩也故曰無所不佩

非帷裳必殺之

減四十六字

朝祭之服裳用正幅如帷是謂帷裳帷裳則不殺非  
帷裳則殺之使要半於下齊倍於要殺則無襜褕以  
其斜裁也不殺則有襜褕以其用正幅也 朝祭之

裳名曰帷裳裳且虛說若說得詳盡不待說必殺之矣考之家禮深衣制度有裳裳云則新安所謂深衣之裳者為是但註云若深衣則不止深衣而已凡裳恐皆然帷裳不殺其餘皆殺也

羔裘玄冠不以弔

斐一條

羔裘朝服玄冠祭服皆吉服也孔子不用之以弔喪蓋喪主素吉主玄弔必變服所以哀死

吉月必朝服而朝

斐一條

吉月謂每月之吉不特正月之朔服者衣冠冕裳之總名致仕之時人或不朝朝或不以朝服夫子則服朝服而朝必謹其所服也此又致仕朝君之制也以上所記夫子衣裳之制皆是與當時之人不同者

齋必有明衣布

必有寢衣一條移置褻裘之下

孔子當祭而齋沐浴既畢必有明潔之衣著之所以明潔其體也明衣只以布為之蓋但取其潔不取其

華也

齋必變食

臧二十二字

平時飲酒茹葷惟齋則變食不飲酒不茹葷其居處也又必遷了平時所坐之處此記孔子謹齋之事前兩段就衣服上說所謂致潔以盡敬後兩段就食息上說所謂變常以盡敬

食不厭精

不厭字有斟酌孔子固嘗飯蔬食矣何嘗必欲如是

割不正不食

減十六字

漢陸續之母切肉未嘗不方斷葱以寸為度 綱目

漢明帝十四年楚王英以謀逆連及太守尹興陸續  
時為尹興掾逮考備受五毒肌肉消爛終無異詞續  
母自洛陽來作食以餽續見考辭色未嘗變而對食  
悲泣不自勝治獄吏問其故續曰母來不得見故悲  
耳使者大怒以為獄門吏卒通傳不然何以知之續  
曰母切肉未嘗不方斷葱以寸為度故知之使者覈

其實陰嘉之以狀聞上乃赦績等還里

不得其醬不食

如食魚膾用芥醬食濡魚用卵醬食麋腥濡鷄濡鱉  
皆用醢醬 內則曰濡豚包苦實蓼濡鷄醢醬實蓼  
濡魚卵醬實蓼濡鱉醢醬實蓼註濡烹煮之也煮豚  
則包裹之以苦菜而實蓼于腹中此四物皆以蓼實  
其腹而煮之也 內則又曰魚膾芥醬麋腥醢醬五  
物之用醬皆以調和其汁也

惟酒無量不及亂

惟酒無量聖人不自為量也蓋酒以為人合懽在人飲量不同若我為主而客能多飲我亦須多飲陪他若我為客而主人固多勸我亦須為之多飲但都以醉為節而不及亂亂則內昏其心志外喪其威儀酒以為人合懽人字泛說

沽酒市脯不食

凡酒脯出于家造者則精潔而且無傷人之虞沽酒



市脯則恐不精潔或傷人也故不食

不撤薑食 謂每食必設薑

祭於公

助祭於公所得胙肉公字讀 助祭於公家所得胙肉當日即分賜了不宿肉至於家之祭肉雖不當日分賜也不過三日皆以分賜了 出三日不食之矣此記者推夫子之意也今又當看地方及天時如何也

食不語

減二十七字

食不語此節正意寢不言附記也 當食而食不對  
人說話語由人先發也當寢而寢自家也不說話言  
由己先發也 食謂正含哺時非謂終食都不語  
答是他說我答述是我述與他言 寢不言也是不  
與人言不成都無人在只我自說以此見言語不可  
分只是所在不同故分

雖疏食菜羹瓜祭必齋如也

減十五字

食無不祭而祭無不敬聖人之誠也 祇作必為是  
若作祇字則在菜羹之內矣

席不正不坐

葉一條減二十九字

只是必正席之意泛說為穩不必依葉氏註 葉氏  
謂南鄉北鄉以西方為上此以方為正者也有憂者  
側席而坐有喪者專席而坐此以事為正者也此蓋  
是外意然亦聖人之所謹也既不正不坐則此等皆  
其所不苟矣本文元未及此須要主一

鄉人飲酒

以大聖人之德而處鄉黨如是後生小子輩可不謹哉可不嚴哉

鄉人讎

芟二條

鄉人非士大夫也讎非大祭之倫也在常人以為可忽矣聖人之意以為鄉人為我讎也我則主人也主人不可慢也於是朝服而立於阼階阼階主人之位也朝服敬也朝服乃當時有官者之常服非如今制

之大慶賀朝服也萬石君子孫為小吏來歸君必朝服見之不名

問人於他邦

問人於他邦人夫子所交之人也夫子遣使往問那人於他邦使者即行則從背後再拜而送之如親見之敬也送本送使者而曰如親見指其所問之人蓋拜送使者亦是為所問之人也

康子饋藥

季康子饋之以藥大夫有賜義當拜受夫子則拜而受之凡賜食必嘗以拜夫子以康子所賜者藥也藥則未知所用何品所療何病所以只拜而受之而不嘗然受而不飲則虛人之賜不惟在我之意有所不能達於彼而在彼之心亦不能無惑於我故明告之曰丘也未達不敢嘗夫大夫有賜拜而受之禮也未達不敢嘗謹疾也必告之直也一事而三善備焉

廐焚

邢氏曰孔子家廐也以退朝知之 吳氏曰家語云  
國廐恐非國廐則馬當問路馬則又重矣 畢竟亦  
問到馬只是初間廐焚之時子獨問人而不及馬迺  
出常情之外有非安排用意所為者此門人所以謹  
記之以垂教也

君賜食

芟一條

君以熟物賜之夫子以君所賜必正席而先嘗之如  
對君然但言先嘗則餘當以頌賜矣然君賜食夫子

既嘗之於已又頒賜於人而獨不以薦者恐出之餽  
餘也君賜之生肉必火熟之以薦於其親榮君賜也  
君賜之生畜則養之所以仁君之惠無故不殺也家  
有祭享及大賓乃用之 君之餽餘在君可以賜其  
臣在子孫不宜以薦於其先

侍食於君

侍食於君君一舉之食也故有祭

疾君視之



朱子謂常寢於北牖下君問疾則移於南牖下蓋在北牖下固東首矣其遷南牖下者亦必東首朱子又曰常時東首亦有隨意卧時節如記云請席何向請衽何趾東首以受生氣也新安曰天地生氣始生於東方依此說則以人身亦小天地也東首只是順其氣之行歟故為受生氣

君命召不俟駕行矣其於父母亦然  
朋友死

胡氏曰朋友人倫之一其死也無父族母族妻族及旁親主之是無所歸也為朋友者不任其責則轉於溝壑而已故曰於我殯此節獨記一曰字必嘗有是事人莫知所處而夫子有是言也又曰古者三日而殯三月而葬但曰殯而不曰葬則其親者在遠必言告之未及故也朱子於此章一則曰朋友以義合二則曰朋友有通財之義愚謂惟平日於朋友之饋雖車馬受之不至於感激無地者方於朋友死無所

歸之時可望其為殯也何則只是於義字看得透也  
此亦觀人之法蓋能以義處己方能以義處人惟能  
以義處人必能以義自處 雲峰曰此節集註於義  
之一字凡三見朋友既以義合當殯而殯義也當饋  
而饋亦義也義所當為不可辭義所當受不必拜  
魏元忠受武后遺詔而感泣不知義也然則所謂一  
抔之土未乾六尺之孤何在元忠之不能效義於李  
氏也固然矣夫朋友非必有大氣力者然車馬之饋

且不拜而元忠乃為武后之詭恩所動甚可惜可恨也

寢不尸

尸謂偃卧朱子曰女生必偃男生必伏可見所謂偃卧似死人者非謂覆卧也朱子之言出離騷

見齊衰者

狎與褻不同狎謂素親狎謂其人與我素熟也褻謂燕見謂我之見其人非在公所禮法之場及稠人廣

坐之中也 變與以貌亦不同變只是改舊容有驚  
哀之意而已以貌則加敬矣而以貌之中亦不同於  
見冕者尊有爵而不敢忽也於瞽者矜不成人而亦  
不敢忽也 既云見齊衰者雖狎必變而又曰凶服  
者式之不亦重複乎曰不然式之者謂在車而式之  
也雖狎必變不指在車

### 有盛饌

敬主人之禮非以其饌也主人禮意之厚亦於盛饌

見之可見今之待客亦不可任情從薄但要知道禮敬之意有不全在飲饌之間則可矣

迅雷風烈必變

減十六字

與大舜之烈風雷雨不迷者並行而不相悖故曰必變非聖人為所驚惶而失次也

升車必正立執綏

芟一條

范氏曰蓋君子莊敬無所不在升車則見於此也見於此謂其莊敬見於正立執綏也

車中不內顧

朱子曰立視五雋式視馬尾此二句最緊要禮曰顧  
不過轂視者直視也顧者反顧也立惟視五雋式惟  
視馬尾雖有顧時亦不過轂不內顧也雋是車輪一  
轉之地五雋則九丈之地矣車輪高六尺圍三徑一  
則濶丈八五雋為九丈

不疾言

減五十字

三者皆失容且惑人失容為重

色斯舉矣

此理最好凡士大夫皆當服膺弗忘如此等句一唱三嘆猶有餘味也

曰山梁雌雉

邢氏曰時哉言雉之飲啄得其時子路不達以為時物而共其之孔子不食三嗅其氣而起

闕

晁氏曰石經嗅作戛謂雉鳴也劉聘君曰嗅當作臭

反古闕張兩翅也見爾雅愚按依邢氏則闕孔子身



上事於鄉黨所載義類為合但雉終為子路所共則  
與上文色斯舉云者不符矣 依晁劉二氏以共為  
拱執之義固於上所謂色斯舉者相符但不聞孔子  
事非鄉黨所載之義也故朱子缺其疑而取邢說在  
前 若經嗅作戛石經者漢靈帝熹平四年詔諸儒  
正五經文字命議郎蔡邕為古文篆隸三體書之刻  
石立于太學門外故謂之石經

四書蒙引卷六